

KUKÒÒKESHA BIIBI

BYÀ MWENA LUKUNÀ



Bèètwābu mu dindà emu, bantu bōnsò. Ne disànkà dyà kwikala baalùkile cyàkàbidi mu dindà emu ku tabernacle, bwà kusambidilakù babèèdi leelù ewu. Bidi ne, pa ciibidilu, tutu tuditàcisha bwà kubwela, ku musangu ne ku musangu, ne—ne kusambidila bantu bātù bālwamù bāfūmina ku myaba mishiileshiiàngàne, bwà disambila.

Nènku mpindyewu netwikalè mwà kuumuka àbidi àdi panshì aa, mpindyewu, bwà masangisha a mu Californie ne a ku Côte Ouest. Nènku ncyà bushùwà ne tudi tulōmba masambila ènù, bwà Nzambi wa mu Dyulu ìkalèku neetù luse ne àtùpè masangisha manène.

Ndi mufūme ku dyalukila, makèèlèlè awu, anyì dilòòlò dishààle's wè, èyo, dībà dipite. Ne makèèlèlè ùvwa dimwè dyà ku . . . Èè, dyàbwàbwà, ne makèèlèlè, àvwa àmwè a ku matùkù a civùlukilu mu nsòmbelu wanyì. Mwaba awu, ndi mumanyè bantu bóbò bakesè mbàbidi, anyì bàsàtù mu citanda emu, bāvwa bantèmù bàà ditùuluka dyà Mukalenge, makèèlèlè awu. Nènku cintu cinène, cilenga cyà dikèma cìvwa cyenzèke, cìndi nciyi ne dībà mu dindà emu dyà kunùlondela to. Kàdi pāmwāpa mu dindà dyà dyàlumingu dilwalwà, kumpalà kwà twètù kuumuka, ndi pāmwāpa mwà kupeta dībà, mu Dyiisha, bwà—bwà kunùlondela. Bu Mukalenge mwà kwanyisha, néndwe, bwà kusambidilakù nànsha babèèdi cyanàànà, mu dindà dyà mu dyàlumingu. Tudi bafwānyine kujinga kuumuka lwà pa dībà nkànkalà, bu byòbi mwà kwenzeka, bwà disangisha dyà ku San Jose mu San Jose, mu Californie. Nènku wèwè ne bantu mu nyūngulukilu amu, ku Côte Ouest aku, aci, tudi twitabuujā ne, pāmwāpa ki ciikalà dībà dīntù mwīndilèndile, kacya kwōnsò aku, dishintuluka dilwalwà dyà mu mudimu wānyì wà bwambi. Ne dyòdi adi didi pabwīpì menemene, mvwa ngeela meeji ne makèèlèlè awu nguvwadi dyènzeka. Nènku ndi ngiitabuujā ne neciikalè pabwīpì menemene mpindyewu, ne necitambè kule ne kule cyōnsò citùkaadiku bamōne anyì bumvwè aci, kacya. Mpindyewu, nwavùlukaayi ne, aci cidi EMU MMÜDÌ MUKALENGE WAMBÀ. Nwamōnu anyì? Nènku tudi ànu bacìndile, dībà kanà dyōnsò.

Nènku bidi bìkèngela bwà twètù kwenza masangisha mpindyewu ku cipalu cyà cisalu cyà cinsangānsàngà. Ngeela meeji ne mmwōmò, kī mmwōmò anyì, Gene? Ku cipalu cyà cisalu cyà cinsangānsàngà cyà ku San Jose, mu Californie. Nènku

neciikalè masangisha a matùkù dikùmi, kubangila ku matùkù a ngondo 20, too ne ku matùkù 29, ku—ku San Jose. Mpindyewu, ikàlaayi ànu batùvùlùke ne nutùsambidila.

Mpindyewu tudi bu ne, bu twètù mwà kupàtuka pa dîbà, ne dîbà dimwè ne citùpà nàнку awu mpindyewu, ditwikalà mwà kubanga masangisha ètù a disambidila babèèdi ne kutwàla kwà Dìyì. Ndi musungùle, mu dindà emu, kaaMufùndù kakesè, myaba yìbìdì mu Bible, bwà kwakulapù.

Kàdi kumpàla kwà twètù kwakula, twǎnjàayi ànu kwinyika mitù bwà katanci kakesè cyanààna, bwà disambila.

² Nzambì mutàmbe kwikala wa ngàsà, tudi tuseemena ne kudipwekesha kwònsò ku nkwasà Webè wa ngàsà mu dindà emu, twètù bu bânà bàdi kabàyi bakùmbànyine, kàdi biikàle tulwa ne diitabuuja didi kadiyi disambakaja mu Nzambì, dyàkatùpèeshàbo kùdi Nyumà Mwimpè, ne Bwikadi Bwèndè bùdi neetù dîbà dyònsò, ne ku mulayi wà kùdi Mukalenge Yesù, wà ne bu twètù mwà kulwa ne didipwekesha dyònsò ne balòmbe cintu kanà cyònsò mu Dîna Dyèndè, tudi mwà kupèebwa dilòmbà dyètù. Ki bwà cinyi, twètù katwèna tutàngila makùmbanyina ètù to, bwalu katwèna ne à nàнку to, kàdi tudi tutùma mèsù paanyimà ku makùmbanyina a Kàlvariyo, kutùvwà bapèebwe ngàsà wetù cyanààna kùdi Mwànà wa Nzambì. Ne tudi mwà kukànda ne lutàtù binsònjì bìdi bifwànyine kutùpwekela ne pa mabòdi, patùdi twela meeji ku twètù, bantu bàdi kabàyi bakùmbànyine aba, ne mùvwàbi ne ku ngàsà Wèndè kwàka ku Kàlvariyo Yèyè ngwàkatwenzela cyòci aci, bwà twamònakù mwà kuseemejiibwa pabwìpi menemene ne Nzambì, too ne ku malanda mene. Nènku mpindyewu tudi bânà bàà balùmè ne bàà bakàji kùdiYe.

³ Nènku nyewù tulwa mu dindà emu, Mukalenge, mwinshì mwà musàka mukèsè ewu, bwà kudilambula, bwà mudimu, biikàle tutonda mpèkaatù yètù, ne—ne mu dikuukwila dyà Nzambì. Tudi batwishùbwe ne Wèwè newikalè neetù ne neutùpèeshè cyumvwilu cyà nyumà cyà dilwa Dyèbè dikaadi pabwìpi adi, bwà twamònakù mwà kulongolola myoyi yètù ku ditùkù ne ku ditùkù bwà bwalu bunènè butùdi bindile munda mwà bidimu binunu abu. Ncyà bushùwà ne bufùki bwònsò bùdi munkaci mwà kutwà mikèmù, bwèla mbilà bwà kusùuludiibwa. Ne nyumà yètù munda mwètù, Mukalenge, yidi yijikula ku musangu ne ku musangu, ne: “Tudi beena lwendu ne beenyi, ne pànwapa kî nkwètù to, kàdi tudi twenda tukèbangana ne Cimenga Cidì Mwibaki ne Mucyènji mwikàle Nzambì.” Tudi bindile bwà cikondo cyà butùmbi aci kulwaci.

⁴ Mukalenge, tudi baswè kwikala tuvùluka ne masangisha aa, patùdi tudisangisha kaaba aka apa, tudi tusambidila bânà Bèèbè bàdi bàsaama ne biikàle mu ntàtù. Nènku tudi tulòmba bwà Wèwè kutwilanganakù neetù leelù ewu mu mùshindù wà

pabwàwù menemene, bwà kwondopa mabèèdi ne màsaamà ónsò munkaci mwètù. Nènku, Mukalenge, bidi mwà kwenzeka ne, mulayi wùndi mfùma ku dyamba ewu, mu ditwilangana Neebè makèèlèlè awu, bufùkù bùcifùminakù ku dicyà, ne mùshindù mwinè wùdì Wèwè muwùshindike mushindikùlùle's. Nènku tudi tuumvwa ne díbà dikaadi pabwípì menemene. Nènku swàku bwà edi diikalè ditùkù mene, Mukalenge, dyènzekàwu, diWashintululà mudimu wà bwambi, Mukalenge, mu cintu kampànda cyàtàmbà kwikala cyà ngàsà bwà cisàmbà Cyèbè.

⁵ Nènku mpindyewu, Taatù Nzambi, katwèna baswè kusambidila ànu bàdi apa aba nkààyaabò to, kàdi bwà bàdi batangàlake eku ne eku pa buloba bujimà, bàdi mu lukèngelu, ne lwà nyumà ne lwà mubidi. Bapèèshèku, Éyì Mukalenge, majinga a myoyi yàbò, bwalu bânà Bèèbè ki kudisubabò mu matùkù aa eku. Dicincimikiibwa dyà kùdì mwena lukunà ndikolè be, kàdi Wèwè udi ne dikànda ditàmbidìle. Bwalu bàakafùnda ne: “Ewu udi munda mwènù mmutàmbe udi mu bàà pa buloba dikànda.” Ku cyòci eci nkutùdì twètù tucimwina. Akùlàku neetù ku Díyì Dyèbè difùnda. Ne patùumukà mu dìndà emu, swàku bwà twàmbè mùvwà bàvwà bàfùma ku Èmaawùsè abu ne: “Myoyi yètù kayìvwakù yìlàkuka kapyà munda mwètù pàvwàYe wàkula neetù mu njila apu anyi?” Tudi tulòmba nùnkù mu Dìnà dyà Yesù, Yèyè wàkafila mulayi awu. Amen.

⁶ Ndi mbala mpindyewu mu myaba yìbidì mu Mukànda wà Genèsè. Wùmwe wà ku yòyi wùdì wùsanganyibwa mu nshapità wa 24, kubangila ku mvnsà wa 56, wùdì wùbadiibwa mùshindù ewu.

Nè yèyè wàkabàmbila ne: Kanùncyàmakanayi kumpalà nànsha, bu mùdìbi ne MUKALENGE wàmanyi kuntuucisha dyàkalenga mu njila wanyi; mpingàjaayi bwà nye kùdì mfùmwànyi.

Ki kwambabò ne: Netùbiikilè nsongàakàji awu, bwà tùdyùmvwilè mukana mwèndè.

Ki kubùkilabò Leebèkà, e kumwambilabò ne: Udi muswè kuya ne muntu ewu anyi? Ki yèyè ne: Ndi muswè kuya.

Ki kutùmabò Leebèkà ne mwanàabò wa bakàj- . . . mwanàabò wa bakàji awu, ne mudìishi wèndè mukàji, ne musadidi wa Abraham awu, . . .

Ki kubèneshabò Leebèkà, ne kumwambilabò ne: Wèwè udi mwanèètù wa bakàji, ikàlà maamù wa binunu byà mìliyò, ne dimiinu dyèbè dikookeshè ciibi cyà aba bàdi bàbàkìna.

⁷ Ne mu Genèsè 22, mvnsà wa 15, tudi tubala nùnkù.

Ne mwanjèlo wa MUKALENGE wàkabiikidila Abraham mu dyulu bwà musangu mwibidì,

Ne wàkamba ne: Ngädìcipidi ku mèmè mwinè, mùdi MUKALENGE wàmba, bwalu wèwè wenji cintu eci, wèwè kwèna mu-...mumbèngèle mwanèèbè wa balùme, mwanèèbè wèwè wa balùme umwèpelè,

Bwà ne mu kubènesha mèmè nènkubèneshè, ne mu kuvudija nèmvdijè dimiinu dyèbe bu mìtootò yà . . . dyulu, ne bu lusenga . . .ku mwelelu wà mbù; ne dimiinu dyèbè nedikookeshè ciibi cyà mwena lukunà wadi;

Ne mu dimiinu dyèbè wèwè nemùbeneshiibwè matungà ónsò a pa buloba; bwalu wèwè watùmikidi dîyi dyányi.

⁸ Mpindyewu Mukalenge àsakidilèku mabènesha Èndè ku kubala kwà Méyì Èndè. Mpindyewu ndi njinga kwangata, bu cyòci mwà kubiikiidiibwa ne ncyena-bwalu, cyena-bwalu cyányi mu dindà emu, dyàmbedi, cìdi ne: “Kwela ku diteeta kumpàlà kwà biibi bilaya.” Nènku cyena-bwalu cìdi ne: *Kukòòkesha Biibi Byà Mwena Lukunà.*

⁹ Nzambi ùvwa wèla nkambwà awu ku diteeta, bwalu Ùvwa mumupè mulayi. Ne pàdi Nzambi ùfila mulayi, Yèyè mmuswè kwikala mutwishiiibwe ne muntu ewu mmukùmbànyine mulayi awu, kumpàlà kwà Yèyè kuuja cidiYe mwambè anyi cidiYe mulayè. Pa nàнку Abraham ùvwa mulayiibwe ne ku dimiinu dyèndè buloba bujimà bùvwa mwà kubèneshiibwa, bwà ne yèyè ùvwa mwà kupeta mwànà wa balùme. Nènku, mwànà ewu, mu yèyè bìvwa bikèngela bwà kupàtukamù Dimiinu divwà mwà kubènesha buloba bujimà. Nènku Abraham, pààkapèèshiiibwàye mulayi awu, ùvwa ne bidimu makùmi mwandamutekètè ne bitaanu; ne Sarah, mukàjèndè, ùvwa ne bidimu makùmi àsambòmbò ne bitaanu. Kàdi Bible ùdi ùtwàmbila ne Abraham kààkatènkakanakù ku mulayi wà Nzambi, ku bupidyà to, kàdi ùvwa ne dikàndà, mwikàle ùpa Nzambi butùmbi. Nènku Nzambi, ku musangu ne ku musangu, ùvwa ùmuteeta, kàdi wàkafika ku diteeta dyà ndekeelu adi kumpàlà kwà dibènesha adi kwenzekadi.

¹⁰ Nènku ki mùshindù wùdibi ne Dimiinu dyònsò dyà Abraham. Nzambi ùdi ùtùpicisha ku diteeta dyà ndekeelu adi ànu pabwìpi menemene ne Yèyè kufila mulayi awu. Ne bu ne bìvwa mwà kwenzeka, mvw’a kujinga kwambakù cintu kampànda kaaba aka, cintàngila mèmè mwinè, kadi nèncilaminyinè. Diteeta dyà ndekeelu adi, bwà kumòna muwàbindulukilàpu. Nènku pààkapìcishilàYe Abraham ku diteeta edi, Wàkasangana Abraham ne lulamatu ànu mùvwàye naalù pààkabangàye apu. Ndibènesha kaayi didici cifwànyine kwikala mu dindà emu bu twètù bàdi bàngatà mulayi Wèndè wà dyondopa aba mwà kwimana ne lulamatu ànu mutùvwà naalù patwàkiimanà kaaba aka ne kuciitaba apu. Cìdi ngàngàbukà mwambè nànsha ciikàle cinyi, shààla wèwè ànu ne lulamatu.

11 Ne pààkenzàye cyôci eci, ne kàyi mubènge ne mwanèndè umwèpelè wa balùme awu, kàdi ùkaavwa wàmba kucimpika keelè mu cyâdi cyà Izàkà, bwà kunyangakaja bujaadiki bwèndè. Yèyè ùvwa mufilèfile bujaadiki, pa buloba bujimà kùdi bàvwàye mumanyàngàne naabò ne, ùvwa mwà kupeta mwànà wa balùme ewu. Kàdi pashìshe pààkafika mwànà ewu, yèyè kulòmbiibwa bwà kubangululayè, ne kunyangakaja ditèkemena diinè dimwèpelè divwàye naadi bwà bujaadiki bwèndè abu kuulabù. Nènku pààkamònà Nzambi ne yèyè ùvwa ne lulamatu ku diitabuuya divwàye naadi kùdi Nzambi adi, Nzambi kutàngidilaYè mu maulu amu ne kwambaYè ne: “Ngaadicipidi ku Mémè mwinè ne Nènkubènèshè ne nkuvudijè, ne dimiinu dyèbè nedikookeshè ciibi cyà mwena lukunà wadi.” Mulayi kaayipu’s wè!

12 Ki Leebèkà, mwinè uvwa ne cyà kwikala mamwèndè wa mwànà wa balùmè mwosha mèsù, mulaya, ne mwindilindila ewu awu, pààkabiikidiibwàye bwà kupita ku diteeta dyà ndekeelu edi, dyà muntu mwenyi uvwayè kacya kàyikù mwanjì kumòna kwònsò eku to, yèyè ùkaavwakù mumòne ànu cyenzi cyà Nyumà Mwimpè. Ne pàvwà baledi bèndè kabàyi mwà kwangata dipàngadika mu kaabujimà dyà ne bivwa bikèngela bwà kuyayè ne mwenyi ewu anyi kubèngayè kuya, bwà kwikala mukàji wa muntu uvwayè kacya kàyikù mwanjì kumòna to, yèyè wàkapicishiibwa ku diteeta dyà ndekeelu. “Netùbiikilè nsongààkàji awu bwà yèyè àdyàkwilè. Netùumvwile mukana mwèndè ní ùyaaya anyi kèna ùya, èyowà anyi to.”

13 Mùshindù awu ki wùdibi bitwàdiibwa kumpàlà kwà Dimiinu dyà Nzambi dyònsò. Bìdi ne cyà kwikala mwèbè mukana. Nzambi mmuswè kuumvwila kùdi.

14 Pa nàнку pààkeediibwàye ku diteeta adi, yèyè kààkeelakana kasunsa nànsha kàmwè to. Wàkamba ne: “Nyààya.” Mémè ntu munangè aci. Kí nnè: “Ngǎnji nkebè dipàngadika dyà kwangata. Ngǎnji nkenketè bwalu abu bimpè” to. Ùvwa mutwishiiibwe ànu menemene. Ki bantu bàdi Nzambi mwà kukwàta naabù mudimu mbòbò abu, paùdi mutwishiiibwe ànu menemene ne Nzambi neàshaalè mukwàte ku mulayi Wèndè. Kwambayè ne: “Nyààya.”

15 Ne bàà kwàbò dìbà adi, balaabiibwe mu mùshindù wà ne, pàmwàpa kabàyi bacimanyè to, kàdi bààkamba ciprofetà pààkatentekelàbo mwanààbò wa bakàji byanza, ne mwanààbò wa bakàji mulela apu; nsongààkàji wa citende mulenga kwisù, wa beena Yudà awu, pààkamushikikàbo pa kaameelù ne kumutùmabò ku ditungà dyenyi, munkaci mwà bantu beenyi apu. Kàdi kùvwa Cintu kampànda pa bòbò. Bààkamba ne: “Dimiinu dyèbè dikookeshè ciibi cyà mwena lukunà wadi. Wèwè wikalè mamwèndè wa binunu byà mìlìyò.”

16 Nènku, leelu ewu, cisà cyà bantu abu aci ne cisàmbà cyà Nzambi aci ncitangàngalàjiibwe kuumukila ku mbù too ne ku

mbû mukwàbo, pa buloba bujimà. Mu dibìishiiibwa dyà ku lufù adi bôbò nebiikalè bu mìtootò yà mu Dyulu, pàngatà makênkè àdi àbàlakanà awu mwaba wàwù, pààpicilàbo mu maulu. Nènku pààlwàbo, nebiikale bu mbû ku . . . ànyì nsenga yà ku mwelelu wà mbû. Nekwikalè binunu byà miliyò yà bôbò abu.

¹⁷ “Dimiinu dyèbè nedikookeshè ciibi cyà mwena lukunà wadi.” Ki mulayi wà mucipù wà Nzambi ngwôwò awu: “Dimiinu dyà Abraham.”

Dìbà adi, ku Nyumà Mwîmpè Wendè, bu mudìbi ne, bìvwa bikèngela bwà maamù awu kwikalayè kàbìdi citùpà cyà mwanèndè wa balùme, bwalu bàdi citùpà cyà musunya awu. Dìbà adi, Nyumà Mwîmpè ukwàcila mudìmu munda mwà bantu aba, wàkamba ne: “Yèyè . . . Dimiinu dyèbè dikookeshè ciibi cyà mwena lukunà.” Pashìishe, pàdì Nzambi ùdìcipa ne Yèyè neàkookeshè ciibi cyà mwena lukunà, dìbà adi mmwaba kaayi wùdì aci citèèka Èkèleeziya wa Nzambi udi ne mwoyi?

¹⁸ Twètù ki Dimiinu dyà Abraham adi. Bwalu, twètù, biikàle bafwè mu Kilistò, tudì tuvwàla Dimiinu dyà Abraham ne tudì bapyànyì pàmwè nendè, mu mulayi mudicipa naawù wùmwèwùmwè awu. Tudì Dimiinu dyà Abraham adi, ne tudì bapyànyì bàà mulayi wònsò wàkapèèshiiibwayè. Kàdi pàdì dyediibwa dyà ku mateeta dilwa, dìbà adi ki ditùdì tupangila’s. Kàdi ncyèna ngiitabuujakù ne Dimiinu dilelèlè dyà Abraham nedipangile to. Dyòdi nediimanè ànu ne bukitù ne lulamatu mwàkenzà Abraham amu.

¹⁹ Mpindyewu tudì tumòna ne Nzambi kèna mwà kwamba cintu kampànda anyì—anyì kufila mulayi nànsha wùmwè pàdìYe kàyi mwà kùwùja to. Bikèngela bwà Ènzè nànkù bwà kwikalaYè Nzambi. Bidimu bimanè kupita, pàvwa cisàmbà cimwècimwè eci, cisàmbà cilaya eci, dimiinu dyà Abraham òvwa mu lwendu edi, munkaci mwà kuya ku buloba bulaya, kùvwa ciibi cìvwa ciimàne, cimukàndàmèene, ne cìvwa mmwanààbò wa balùme sungasunga, Moàbà, wàkamba ne: “Kanwàkupicilakù mu buloba bwànyì to. Nèntangilè bwà kanùpicidi mu buloba bwànyì to.”

²⁰ Yèyè ne: “Ngombe yètù yòyi midyè dishindà dyèbè anyì minwè màyi ènù, twètù netùnufutèbi.”

Kàdi yèyè ne: “Kanwàkupicilakù mu buloba ebu to.”

²¹ Kàdi mulayi wà Nzambi wàkashààla mulelèlè. Ki kuyabò kangata mupròfetà wabò, Baalàmà, ne kuyabò nendè bwà kwelayè cisàmbà aci mulawu. Kàdi cyàkambàye ncyòci eci. Bààkateeta bwà kumuleeja luseke lwà lutàmbe bubì lwà dimiinu dibènesha adi, kàdi Nzambi wàkamuleeja luseke lwàdì lwà lutàmbe bwîmpè. Wàkamba ne: “Ewu yònsò wèla Izalèèlè mulawu neèdiibwè mulawu, ne ewu yònsò wàmubènesha neàbeneshiiibwè.” Nènku biibi byàkalekelediibwa bwàshì ne

Izàlèlèlè wàkápícila mu bibandabanda abi. Nzambi ùvwa mulayè ne yèyè neàkookeshè ciibi cyà mwena lukunà wendè.

²² Paanyimà, pààkápità bidimu, kwàkalwa kampànda dínà dyèndè Danyèlè, ùvwa mu mulongo wà Dimiinu dyà Bukalenge edi, ne mu mulongo wà milayi ayi, bwalu yèyè ùvwa Dimiinu dyà Abraham. Ne Nzambi ùvwa mumusungùle kumpàla kwà difúkà dyà dyulu ne buloba, bwà kwikalayè mupròfetà Wendè, ne ùvwa ne nsòmbelu wa bukítù ne wa lulamatu. Nànsha mene mu buloba bwenyi amu, yèyè ùvwa mudipàngàdikile munda mwà mwoyi wèndè amu ne: “Mèmè ncyàkudìkooyishakù naabò to.” Ki Dimiinu dilelèlè dyà Abraham ndyòdi adi; musòmbèle mu buloba bùvwà bushiilàngàne, musòmbèle munkaci mwà bantu bàvwà bashiilàngàne, kàdi mwikàle ne bukítù ku mulayi awu. “Ncyàkudìkooyishakù naabò to. Nènshaalè ànu ne lulamatu.”

²³ Nzambi kumwelaYè ku diteeta mwàkeelàYe tatwèndè, Abraham amu. Ki mfùmù kwamba ne: “Anyi newikàlè bu umwe wa kutùdi ne neùkuukwilè mùshindù wutùdi twètù tukuukwila ewu, anyi nènkwelè mu bwinà bùle téntè ne nyama yà ntambwè miikàle ne nzala.”

²⁴ Danyèlè, ànu mùvwà Abraham tatwèndè amu, wàkamba ne: “Udi mwà kungeela mu bwinà bwà ntambwe amu, kàdi ncyàkwaminakù nànsha cimwè cyà ku bimfwànyi byèbè abi to. Ncyàkwangatakù ntèndeleeleu webè wa kwìsùkwìsù awu to. Nènshaalè ne lulamatu kùdi Yèhowàh.”

²⁵ Ki dībà adi kulwakù diteetangana dyà makàndà. Mfùmù awu kushààlayè mulamàte ku mulayi wèndè ne kwangatayè mupròfetà awu, anyi kwambayè bwà bàmwangatè ne bàmukùpè mu bwinà bwà ntambwe. Nènku nyama yà ntambwe ayi, mwena lukunà wa Danyèlè awu, pààkápàtùkàyì ne kudyèlayi kùdi mupròfetà awu, Nzambi wàkashààla mukwàte ku mulayi Wèndè. Kukwàtayè ciibi cyà mwena lukunà wendè. Nzambi wàkiimanyika Mwanjèlo mwaba awu kumpàla kwà nyama yà ntambwe ayi, e kukwàtayè ciibi aci. Nzambi ùtu ùshààlà mukwàte ku mulayi Wèndè. “Yèyè neàkookeshè ciibi cyà mwena lukuna wendè.” Nzambi ngudi mwambè nànkù.

²⁶ Pashìishe kùvwa bakwàbò bàsàtù muntwamu bàvwà bacìpe cyèlekà bwà kwikalabò ne lulamatu ku bwalu abu, bàvwà cyà bushùwà Dimiinu dyà Abraham, ne bòbò abu bàvwa n’Shadràkà ne Meeshàkà ne Abèdènègò, ne bàakeediibwa ku diteeta. Ki kwambabò ne: “Nwènù kanùyì biinàmè panùmvwà nkòmbè yìdila ne mpungi yèla apu to, nwènù kanùyì biinàmìne ntèndeleeleu wetù, ne balekèle bintu binùdi nutwà nyama ku mikòlò abi to! Ne nwènù bònso’s nudi babolè bolebole, twamb’eku twamb’eku. Ntèndeleeleu wenù awu kì mmupìte wa muntu kanà mukwàbò yònsò to.” Katùtukù tuumvwa aci dībà dyònsò anyi? Kàdi ntè—ntèndeleeleu wa Yesù Kilistò mmushiilàngàne. Bukolè bwà dibiiikà Dyèndè dyà ku lufù

mbushiilàngàne. Twètù tudi cisàmbà cishiilàngàne, cisàmbà cyà pabwàci, bwakwidi bwà bumfùmù. Nzambi ngudi wenza dishiilangana.

27 Kàdi pàakambàbo ne: “Nebikengelè nùlwe bu twètù.” Bìvwa bifwànyine kwikala ànu bìmpè bwà Shadràkà ne Meeshàkà ne Abèdènègò bu ne bàvwa baswè kulwa bu bòbò, kàdi kacya bòbò kabàvwakù bafwànyine kujinga kulwa bu beenyi abu to. Mpindyewu, kwambabò ne: “Nwènù kanùyì bacyénzè to, tudi ne ciibi kaaba aka cìdì cìfila mu cikùtù cyà kapyà, citùdì mwà kukàngula ne kunùkùpamù, nènku nenùjingè munùvwaku nànsha mwà kwikala balwe bàà kutùdì.”

28 Bòbò bààkavùluka mulayì awu. Kubèndeshabò tàmakàtamàkà too ne ku cikùtù cyà kapyà aci. Nènku pàakuunzululàbo ciibi ne kubàkùpabò mu ndìmì yà kapyà ayi, mwena lukunà wabò uvwa mufwànyine kubòòsha kubàshidisha awu’s, bààkakwàta biibi byà mwena lukunà wabò. Nzambi wàkatùma Mwan’Èndè mu ndìmì yà kapyà ayi ne wàkatalaja mpeepèlè, ne wàkayiikilangana naabò pàvwàbomù apu. Mulayì wà Nzambi wàkashààla mulelèlè. Kukwàtabò ciibi cyà mwena lukunà awu. Banjì dyàmbedi kwediibwa ku diteeta, ki pashiishe kukwàtabò ciibi cyà mwena lukunà.

Kàvwa n’Yesù Wàkafila mulayì awu anyi? “Wèwè nànsha mulèndwishe pàtupù umwe wa ku bàna bakesè aba, bìvwa bipìciibwe ne wèwè mwà kuswikiibwa dibwe dyà mpelu munshìngù ne kwinyijiiibwa mu ndòndò wa mbù. Kùlèndwishikù nànsha dilèndwisha bàna bakesè bàdì bàNgiitabuuja aba to. Ne bimanyinu ebi nebifilè aba bàdì bàNgiitabuuja.”

29 Yèyè wàkafila dishiilangana. Wàkaleeja uvwa witabuuja cyà bushùwà ne uvwà kàyì witabuuja.

Mwaba awu, misangu yònsò, kùdì misùmbà yà bantu yisàtù, yìdì: mwena bupidyà, mwena kwitabuuja wa budìngìbudìngì, ne mwena kwitabuuja. Kàdi Nzambi ùdì ne mùshindù wà kujaadika ne mwena kwitabuuja nganyì. Mwena kwitabuuja awu ùdì wìmana kamùngùlù pa cìdì Nzambi wàmba ne m’Bulelèlè aci. Èyowà.

30 Ùvwa ng’Eliyà, mwena Tiishibà, pààkafikàbì ku diteetangana dyà makàndà, mu mùshindù wà ne yèyè wàkadyàmbedila ne yèyè nguvwa umwèpelè mu ditùnga ucìvwa ne mwoyi bwà Nzambi. Nènku mfùmù ùvwa ne cyà kumwela ku diteeta. Nènku bàvwa bàmukèngesha. Ne kaamukalenge-mukàji, kàà kwisù kulaaba bilaabu aku, dìnà dyàkù Izàbèlè, kàvwa kàfuuna bwà kumushebeya. Kàdi pààkafikàbì ku diteetangana dyà makàndà, Eliyà wàkakòokèsha biibi byà mwena lukunà wèndè ne wàkaaluja ditùngà dijimà kùdì Nzambi. Nzambi ùtu ùshààla mukwàte ku mulayì Wèndè.

31 Ùvwa m’Mòsà, paanyimà pàà mumanè kwikala pèndè mu mulongo wà Dimiinu dyà bukalenge edì, Dimiinu dyà Abraham,

ne pàakatùmiibwàye mu Èjipitù, bwà kusùngila bânà bàà Izalèlèlà; ne Nzambi wàkamupà bimanyinu ne maalu a kukèma byà dyenza, ne bwà kutuuta naabi buloba, ne bwà kupàtula ndimbà, ne nkùpà, ne mîdimà, ne mabwe a mvùla, ne mvùla, ne kapyà, ne yèyè ùkaavwa mwenzè bishimà byònsò ebi. Kàdi, pàakabàpàtulàye ku bulombodi bwà cyanza cyà Yèhowàh, kwàkalwa cikondo cyàkatwilanganàye ne ciibi pankaci pèndè ne buloba bulaya. Kùvwa Mbù Mukünze, mucyàmàkàne mu njila. Bàvwa banyungulukila kùdi cilwilu cyà Pàlò, mikùnà, ne bipèlèlà, ne Mbù Mukünze. Kàdi Mòsà wàkaseemena kumpàla e kukòokeshayè ciibi cyà mwena lukunà wèndè, ne kupicilayè mu Mbù Mukünze awu, mu buloba bùme, ànu mùvwàye wèndela mu njila wa lupwishi amu. “Yèyè neàkookeshè ciibi cyà mwena lukunà.” Nzambi ngudi mwambè nàнку, ne aci's ncikòse bwalu.

³² Cívwa ànu mbidimu bikesè cyanàànà paanyimà pàakalwà mateeta awu, ne èkèleeziyà kunyùkushiibwàye yònsò, mùdìbi bipeepèle bwà disangisha dyà bantu kunyùkushiibwadi pàdi ànu cintu kampànda cìmwèka bu cìdi kaciyi cyènzèka mùshindù wùdici cikèngela awu to. Nzambi ngudi ucyèna mùshindù awu. Nzambi ngudi ubweja dibinduluka mu èkèlèeziyà ne: “Mwànà wa balùme yònsò udi ulwa kùdi Nzambi ùdi ne cyà kuteeciibwa, ne kujaadikiibwa, ne kwediibwa ku diteeta.” Ùdi ùlekela bubèèdi bùkulenga. Ùdi ùlekela màsaamà àlwa pambidi pèèbè, bwà kukuteeta ne kukujaadika, bwà kuleeja bàà pa buloba ne wèwè udi bulelèlà Dimiinu dyà Abraham. Ùdi ùbyányishila ku diswa Dyèndè Sungasunga. Ùdi wányishila makènga makolè a cintùluntùlu. Ùdi wányishila bintu byònsò ebi, ne ùlekelela dyabùlù, bwà kukuteetayè. Ne yèyè neenzè byònsò pa kuumusha kukushebeya. Mmufwànyine kukwela mu bulààlù bwà ntàtu. Mmufwànyine kwenza bwà beena mutumba bèèbè bàkukùdimùkilè. Mmufwànyine kwenza bwà èkèleeziyà àkukùdimùkilè. Ùdi mwà kwenza pàmwè ne cintu kanà cyònsò, ne ndiswa dyà Nzambi bwà kucyènzayè. Tudi bayiile ne ncyà mushinga mukolè kutàmba ne ngòlò, kutùdi.

³³ Kàdi bishi bwà Abraham ne Izàkà, pa mukùnà, mwinè uvwabò bafidile mulayi awu? Nènku ku lulamatu lwèndè ne ku dimanya dyèndè, ne diitabuuya dyèndè mu Yèhowàh, nku cyòci aci, ne ku cyòci nkààyaaci, kùvwa Nzambi mupwekèshile mèsù wàmba ne: “Dimiinu dyèndè nedikookeshè biibi. Ngädicipidi ku Mèmè mwinè ne Nèngènzè bintu ebi.” Kakùvwa uvwa mutàmbe bunène uvwa Yè mufwànyine kudicipilakù to, kàdi Wàkadicipila ku Yèyè mwinè.

Nènku, piikalàbi ne Yèyè wàkalekela Abraham wèdiibwa ku diteeta too ne ku kaaba kàà ndekeelu aku, s'bidì bikèngela bwà Àtuteetè mèmè ne wèwè bwà dîbà dyà ndekeelu adi, cikondo cyà dipàngadika cìdi byònsò kule neebè aci. Bidi bikèngela bwà wimanè pàà nkààyeebè. Àlèluuyàh! Ki cyòci aci's.

³⁴ Imànyìnà pàà nkààyeèbè. Upàtuka kwàka wamba ne: “Nànsha Yèyè munshebèye, nànsha nànkù nèntungunukè ànu ne kuMweyemena.” Ki Dimiinu dyà Abraham ndyôdi adi. Ki Yèyè udi ufila mulayi nyawù. “Cìdì bakwàbò bàmba, cìdì bakwàbò bènza nànsha ciikàlè cinyi; bwànyì mèmè ne bàà mu nzùbù mwànyì, netùkwacilè Nzambi mudimu.” Yèyè ne: “Bakwàbò bôbò bambè ne: ‘Kakwèna bwà nsongo mu dilabula adi to. Mmushikì wà masaluka’; bwànyì mèmè ne bàà mu nzùbù mwànyì, netùkwacilè Nzambi mudimu.”

Nènku ntu muswè kutwà ku cyà Pòlò mwaba ewu mene, kwamba ne: “Mu mùshindù ùdìbò bàbìikila ne ‘ndipàmbuka’ awu ki mùndì nkuukwila Nzambi wa baataatù bèètù.”

“Nànsha kulwè beena kabwabwa mu èkèleeziyà, nànsha kwikàlè bakònyangaji bàà maalu, ne nànsha mùdiku kùlwa baprófetà bàà mashimi bàà mìshindù yònsò ne bikwàbò mu èkèleeziyà munkacì mwà bantu amu, ne ku mutumba ne bikwàbò byònsò; kàdi bwànyì mèmè ne bàà mu nzùbù mwànyì, netùkwacilè Mukalenge mudimu. Nànsha bònsò balekèlè kulwa, nànsha èkèleeziyà mukwàte mashika, kabàyi bàcyùka maalu, mèmè ne bàà mu nzùbù mwànyì, netùkwacilè Mukalenge mudimu. Nànsha bu bôbò mwà kusambidila muntu kampàndà kàdi kàyi mwondòpìibwe; aci kacýèna ne bwalu nànsha bukesè to; bwànyì mèmè ne bàà mu nzùbù mwànyì, tudì tukwàcila Mukalenge mudimu.” Mateeta ne dyediibwa dyà ku cipimu.

³⁵ Bantu kabàtu bàpanga kupangila to, kàdi Nzambi ngudi nànkù. Muntu, wèwè mutèèkèlè meeji pa muntu, yèyè’s neénzè cilèma. Pàmwàpa kakùyi ku bukolè to, kàdi neàcyènzè. Nzambi ngudi umwanyishila bwà kucyènzayè bwà Wàmòna mwà kunyùkusha diitabuuja dyèbè kudyùmusha kùdì muntu. Diitabuuja dyètù kadyèna mu lungènyì lwà muntu to, kàdi mmu bukolè bwà dibìikà dyà ku lufù dyà Yesù Kilistò. Ki mwaba wùdì Dimiinu dilelèlè dyà Abraham dishikikila mulayi wàdi awu. Bwalu, yèyè ùdi mwà kwikala Dimiinu dyà Abraham ànu pàdiye ùpeta Nyumà Mwîmpè. Kàyi ne Nyumà Mwîmpè to yèyè kèna Dimiinu dyà Abraham nànsha. Diitabuuja òmwèdimwè òvwà munda mwà Abraham adi ndidì dibwelà mu mwena kwitabuuja. Nànsha cinyi cyènzèke anyi cibèngangana bishi, mwena kwitabuuja ùdi ùtùngunuka yèyè ànu ne kuya.

³⁶ Batentekedi abu bààkaalukila ne bààkamba ne: “Kaa, s—s’mmacimbu’s bwà kuteeta. Kabyèna ne musinga bwà kutùngunuka to, bwalu bantu abu mbàà mfyondo kuntwaku. Ne bàdi ne makalenge manène, ne bàdi—bàdi ne mafùmà, ne, mòna’s, twètù tudì mene tumwèka ànu bu tupasu ku luseke lwàbò.”

³⁷ Ncyèna mumanyè to, kàdi ndi mutwishìibwe bwà kwitabuuja mwaba ewu ne Yoshùwà ùvwa ànu kashaawùkè kèètù kàà menemene aka, kaamuntu kàà katùpà, kakesè kàà

menemene. Ndi mwà kumumòna, ùtùpikila pa—pa kashèètè kàà mùshindù kampànda, wàmba ne: “Balúmyàna ne bânà bèètù,” wàmabila bantu miliyô yìbìdì, “twètù tudi batàmbe ne bukolè bwà kubàkwàta.” Nwamònu anyì? Bwà cinyì? Ki Dimiinu dyà Abraham ndyadì. Nzambì ngwákafila mulayì. Cìkaavwa cintu cyàbò bóbò. Nzambì ngwákafila mulayì. Dikàndameena nànsha diikàle dyà bìshi, Dimiinu dilelèlè dyà Abraham dyákamba ne: “Tudi mwà kubùkwàta bwalu Nzambì ngudi mutùpèèshebù.”

³⁸ Ki wèwè udi mwimàne mu dindà emu awu. Ki Èkèleziyà wà Nzambì udi ne mwoyi udi mwimàne wàwa. Nànsha nì nganyi mukwàbò mwambè cinyì, cìdì ngàngàbukà wàmba, nì ncinyì cyònsò, cìdì mwena bupidyà wàmba, tudi mwà kutàmba cyònsò cìlwalwà aci. Twètù tudi Dimiinu dyà Abraham, ne netùkookeshè ciibi cyà mwena lukunà wetù, nànsha mwena lukunà yèyè wa bìshi. Nzambì ngudi mufile mulayì. Wùvwa ngwàbò, cintu cyàbò bóbò.

³⁹ Dyondopiibwa ncintu cyèbè wèwè. Lupàndù ncintu cyèbè wèwè. Nyumà Mwìmpè ncintu cyèbè wèwè. Kàdi kùdì bayiishi banène binunu, ne bikwàbò mu ditungà leelù ewu, bàdì bàmba ne: “Kabyèna nàнку to.” Kàdi Dimiinu dyà Abraham dyòdì ndimanyè ne mmùdìbì. Bàdì bènda bàpaatamù buludì ne bàkòkeshà biibi byà mwena lukunà. Nzambì ngudi mwambè ne nebàcyènzè. Bàdì bàcìtabuuja bwalu mmulayì. “Dimiinu dyèndè nedikookeshè ciibi cyà mwena lukunà.” Kàdi neùpicilè ku mateeta, dyediibwa dyà ku cipimu.

⁴⁰ Ki Yoshùwà kwimanayè mwaba awu, ne lulamatu lwònsò. Kalúmyàna aku kwambakù ne: “Nànsha bóbò biikàle banène bàà bìshi. Nànsha bóbò ne difùmà dyà mùshindù kaayi, bimanu byà bimenga byàbò nànsha biikàle bitùmbùke munyì, ne nànsha ciikàle cinène munyì. Mulayì wètù twètù, wùdì ne: ‘Ciibi necikookeshiibwè kùdì Dimiinu dyà bânà bàà Nzambì,’ ne tuyàaya bwà kubikwàta. Twètù tudi babàtàmbe.” Kaa, adi’s ki Dimiinu dilelèlè.

⁴¹ Bààbùngì bàà ku bààkalediibwa, bàà ku dimiinu dyà mu mubidi abu, bààkamba ne: “Katwèna ànu mwà kucyènta to. Kabyèna ne mushinga bwà kuteeta to. Nwamònu’s, mbatùpìte ku búngì. Mbatùtàmbe; twètù’s kàdi ki bàà cinu.” Nànsha nàнку, kàvwakù. . .Bàvwa bóbò batàngìle ku. . .cìvwà dísù dìmòna. Kàdi Yoshùwà yèyè ùvwa ùtàngìla cìvwà Nzambì mwambè.

⁴² Dimiinu dyà Abraham kadyèna dìtàngìla ku cintu nànsha cìmwè cyà ku byà mubidi to. Bóbò bàdì batàngìla ku cìdì Mukalenge mwambè. Ki mulayì ngwawù. Ambàayi túng bu ne Abraham ùvwa mutàngìle ku byà mubidi? Kùdì mukàjì wa bidimu lukàmà. . .Makùmì citèemà, ki bìvwàye naabì. Ne mulùmè ne lukàmà. Ne ùvwa musòmbe ne mukàjì awu kacya pàcìvwàye nsongàakàjì wa citende, ne yèyè mucikàle nsongàalùmè wa citende, kabàyi ne dimiinu to. Yèyè

kàakatàngila abi bintu to. Wàkamba ne wàkabala bintu abi bu ne kabìvwakù to, bwalu yêyè ùvwa ùtàngila ànu cìvwa Nzambì mwambè. “Nênkubènèshè, Abraham, ne Nènkupèèshilè dimiinu adi ku Sarah.” Pèndè kuciitabuujà. Kwèna utàngila dikàndameena to. Tudi tutàngila cidi Nzambì mwambè. Nzambì ngudi mucyàmbè, aci’s ncikòse bwalu.

⁴³ Ne dībā adi pàakapwekàye ku Yadènè, pàakavwijiibwà Yoshùwà kàmàndà munène wa cilwilu, ki kupwekabò too ne ku mwelelu menemene kwà màyi ne biikàle mwà kutàngila dyàmwàmwa ne kumòna Yelèkò. Kàdi, pankaci pàabò, pàkaavwà Yoshùwà mumanè kulongolola cilwilu cyèndè apu, kùvwa ciibi. Ciibi aci cìvwa cibìkidiibwa ne Yadènè.

Kàdi mulayi wà Nzambì wùtu mwìmpè ku ciibi ne ciibi cyònsò. Nànsha ciikàle ciibi kaayi, mulayi wà Nzambì mmwìmpè. “Yêyè neàkookeshè biibi byà mwena lukunà wendè.” Aci’s ncikòse bwalu.

Pàakapwekàye ku Yadènè mu dindà adi, pàmwàpa, nêngiitabuujè ne dyabùlù ùvwa ne mavuba a bipeepèle bikolè malembèlèle myaba yònsò, màyi manènè a kale a bitoci awu munkaci mwà kupweka, madimi àvwa mabwikila kùdi dipaasalala dyà màyi. Kaa, cikondo kaayi cyà diteciibwa’s wè! Kàdi Yoshùwà wàkamba ne: “Dìlongòlolaayi, nenùmonè butùmbi bwà Nzambì.” Ki kudijidilabò ne kudilongololabò, bàdìlongolola pàvwà byònsò bìmwèka bu ne bìvwa bibèngàngàne. Kàdi adi òvwa n’Dimiinu dyà Abraham, òvwa Nzambì mudicipile ne: “Nèmmupèèshè ciibi” adi. Kufikayè ku Yadènè, uvwa ciibi cyèndè awu, kì kucikòkeshayè.

⁴⁴ Dindà dyà ku àdì panshì aa nebikengelè bwà mèmè kufika ku ciibi cyà ndekeelu aci. Bìkèngela bwà ùfikè ku Yadènè awu, kàdi Dimiinu dyà Abraham nedikookeshè ciibi aci. Nànsha ciikàle cinyi, yêyè neàkookeshè ciibi cyà mwena lukunà yònsò.

⁴⁵ Bantu bònsò abu bàvwa bantu banène. Bàakafwila mu njila wa mudimu. Kàdi, ndekeelu wa byònsò, dīngà ditùkù mu Betèlèhèmà wa Yudaàya, Dimiinu dyà Bumfùmù dyàkalediibwa. Bwalu, makwàbò ónsò awu àvwa ànu mindidimbi cyanaàna. Dimiinu dyà Bukalenge dyàkalediibwa, kadiyi dyà kùdi muntu to. Kàdi Yêyè wàkalediibwa kùdi virgò kampànda, mwikàle ne bukolè mu mijilu Yèndè, bwà kucimuna lufu ne ifernò. Nzambì ngwàkenza mulayi awu. Muntu wetù wa pàtupù ewu kàvwa mwà kucyènza to. Kàdi Nzambì Yêyè ùfila mulayi, Yêyè ùdi ànu Nzambì umwèumwè uvwa Yè mu tusunsa tukesè kumpàla, ne Abraham awu, Yèhowàh-yilè, Mukalenge neàlongololè njila bwà kukòkeshà ciibi aci. Netùcyènzè bìshi? Yoshùwà wàkafwà. Mòsà wàkafwà. Bakwàbò bònsò bàakafwà. Kàdi Nzambì wàkamba ne: “Yêyè neàkookeshè ciibi cyà mwena lukunà wendè.” Mmunyi mwàkòkeshàye lufu? Yêyè ùdi ne mùshindù

wà dyenza maalu. “Neàkookeshè ciibi cyà mwena lukunà wendè.”

⁴⁶ Dimiinu dyà Bumfùmù dyàkalediibwa. Yèyè wàkateeciibwa mu mùshindù wònsò bu twètù. Ànu mùdi wèwè ne cyà kuteeciibwa amu, ki mùvwàYe pèndè. Dyabulu kuyayè Nendè ne lubilu lwònsò mu cipèèlà, pààkapetàYe Nyumà Mwímpè, munda mwà matùkù makùmi ànaayi a muunya ne a bufùku, bwà kuteeciibwa. Nènku pààkapàtukàYe. . . Ne ku lufù Lwèndè, bààkaMutuuta misonso mu byanza, ne kuMutwilà matè mwìsù. Wàkapticila ku bubèèdi ne bubèèdi bwònsò. Kadi pàvwàYe pa buloba apa, Wàkajaadika ne Úvwa mwà kucimuna bubèèdi. Pàvwà mamwèndè wa mukàji wa Peetèlò mulààle, úsàama tunèkè twà tuzakaja mubidi, Yèyè wàkamulenga ku cyanza ne mubidi-luuyà wàkajika. Pààkeelà mwena nsudi awu lubilà ku ciibi cyà cimenga ne: “Mukooyike! Mukooyike! Bu Wèwè muswe, Udi mwà kunsàngaja.”

⁴⁷ Yèyè ne: “Ndi muswè. Sàngalà.” Wàkacimuna ne kukòokeshà ciibi cyà nsudi. Wàkakòokeshà ciibi cyà mubidi-luuyà.

Wàkafikisha bufùki bwònsò ku diMutùmikila. Yèyè nguvwa Dimiinu dyà Abraham adi, Dimiinu dyà Bumfùmù, uvwa mulayi mufidiibwe kùdiYe awu; kùdiYe, Abraham ne Dimiinu dyònsò òvwà òmulondà adi, too ne ku Dimiinu dyà Bumfùmù, ne Dimiinu dyònsò paanyimà Pèndè. Mulayi wà Nzambì mmulelèlà. Yèyè wàkacimuna bubèèdi.

Wàkacimuna diteeciibwa. PààkaMutwilà mwena lukunà awu matè mwìsù, kuMutuuta cintu ku lubàngà, Yèyè wàkafila luseke lukwàbò. PààkaMutuùlábò myedi ku cibàngà ne kuMutwilabò mate, Yèyè kààkapingajilanganakù to. Wàkacimuna ciibi cyà diteeciibwa ne wàkacikòokeshà.

⁴⁸ Pashiishe wèwè udi wamba ne: “Cyànyì cijì kacyèna cìndekela ngènta nànkù to.” Wèwè, Dimiinu dyà Abraham, èyowà’s, mukalenge, Yèyè’s wàkacimwinaci.

⁴⁹ PààkaMuyòbolàbò, Yèyè kààkapingajilanganakù to. PààkaMwelulwilàbò, Yèyè Wàkashààla mupùwe. PààkaMubiikilabò ne ndémon, Yèyè Wàkashààla mupùwe. Úvwa ne mudimu wùmwèpelè, mmudimu wà Taatù, ne Yèyè úvwa úya eku ne eku wènda wènta wòwò awu. Pashiishe, ndekeelu wa byònsò, kuyabò Nendè ku nkùrusè. Byàkakèngela bwà lufù lùkungamanganè Nendè. Bakwàbò bònsò bààkacimuna mbù, ne bààkacimuna bufùki, ne bààkacimuna nyama yà ntambwe, ne bààkacimuna kapyà. Bààkacimuna byònsò pa kuumusha lufù. Kàdi ki Kampànda n’Yèyè ewu, uvwa mu Bwèndè bwongò, mwòmò amu, mwèyela bukòlè bucimunyi bwà lufù. Ki kukwàtabò byanza Byèndè ne kuMwadijabò ne kuMupoopelabò ne misonso pa nkùrusè. BààkaMutuuta ne kuMwela mfimbù mu mùshindù wà ne mifubà Yèndè yàkashààla miMutàngile. Kàdi pààkènzàbò nànkù, ne benzè byònsò bivwàbò mwà kwenza abi,

lufù kuMutuutalù, lwamba ne: “Mpindyewu ndi nKwangata mungàakangata Yoshùwà. ndi nKwangata mungàakangata Danyèlè. Ne Nèngènzè byònsò ebi, bwalu nènKufikishe ku difwà.”

⁵⁰ Ne Wàkafwà mu mùshindù wà ne díbà dyàkadyùmvwà bundù. Wàkafwà mu mùshindù wà ne bufùkì bwàkafwà bundù ne bwàkapanga mwà kwenda. Díbà dyàkabwela mundaamuunyà. Mitootò kayìvwakù mwà kupàtuka to. Wàkafwà mu mùshindù wà ne bintu abi byàkalvwà bifìike mu mùshindù wà kùyìkù mwà kumòna cyaanza cyèbè kumpalà kwèbè to, mundaamuunyà. Ndi mufwànyine kudifwànyikijila ne bufùkì bwàkamba ne: “Lekèlè mfwe Nendè.”

⁵¹ Mwanèètù! Pashìishe dyabùlù kutùmayè musùukà Wendè wà mushinga mukolè awu mu ciinà cidì kaciyi ne cishìikidilu cyà ìfernò. Kì biibi kuunzulukabì, kàdi Yèyè kupàtuka mu ditùkù diisàtù, kulùcimunaYè. Amen. “Dimiinu Dyèndè nedikookeshè ciibi cyà mwena lukunà.” Mucìmùne lufù! Wàkacimuna ìfernò. Mu dindà dyà kumpalà dyà Paasàkà adi, Wàkacimuna lukità. Mpindyewu tudi biimàne, batàmbe ne bacìmunyi, ku Yèyè Wàkatùnanga awu.

⁵² Mu Ditùkù dyà Mpenta Yèyè wàkatùma Nyumà Mwímpè, bwà kutùngunuka, kùdì bàà Bisàmbà byà bendè, ne kupàtula Dimiinu dyà mulayì. Bwà kupèèsha bàà Bisàmbà byà bendè, bantu biipata abu, kubàpèèsha dibàtiiza dyà Nyumà Mwímpè, bwà kubàbweja mu Mulayì awu. Mpindyewu tudi ne bukenji bwà kucimuna bubèèdì bwònsò. Kabyèna bikèngela bwà tubùcimùne to; mbumana kucimuna. Butùdì twètù naabù bùdì ànu bwà kunana mulayì awu bwà kukawàngata. Bùkaadi bumana kucimuna. Lufù nducimuna. Ìfernò mmucimuna. Bubèèdì mbucimuna. Diteeciibwa nducimuna. Démons yònsò mmicimuna. Ìfernò mmucimuna. Lufù nducimuna. Lukità nducimuna. Tudi biimàne mu ciibi, tubyàngata, kabìyi bikèngela bwà twètù kutuuta dizajì nansha òmwè to. Byònsò mbimana kufucila.

⁵³ Mwena lukunà Wendè, yèyè neàkookeshè ciibi cyà mwena lukunà wendè. Búngì kaayi? Binunu byà miliyò; yèyè neàkookeshè ciibi cyà mwena lukunà Wendè, mwena lukunà yònsò. Yèyè wàkabiika ku bafwè. Tudi naaci bwalu Yèyè mmutùpèeshèci. Byònsò ndipà dyà kadìyi difidila difutu to, pa kuumusha byònsò abi, ne byònsò bidìye mwenzè, ne mucìmùne ciibi ne ciibi cyònsò. Mmucìmùne bubèèdì, mukwàte ciibi aci. Cintu cimwèpelè cidì cikèngela twètù kwenza nkuya tàmakàtàmakà too ne ku ciibi aci, kwamba ne: “Mu Dìnà dyà Yesù Kilistò, Mucìmunyi awu!” Amen.

⁵⁴ Pàdì díbà dílwa bwà kufwà, ne lufù lwambè ne: “Tàngilàayi mùndì mmufikisha ku divila dyà ntèndeelè wendè awu.”

55 “Mu Dîna dyà Yesù Kilistò wa ku Nazalèetà, disàkè paanyimà, Yadènè!” Diimiinu dyà Abraham didi dikwàta ciibi.

56 Mòna’s, Pòlò wàkamba, pavwàbo bàdilongolola bwà kumukòsa mutù, Dimiinu dyà Abraham, kwambayè ne: “Lufù, kalonda kèbèbè kàdi penyì? Lukità, buci munyi bwèbè bùdi penyì? Twasàkidila kùdi Nzambì Udi utùpèèshila buci munyi ku Yesù Kilistò.”

57 Yèyè neàkookeshè ciibi cyà mwena lukunà wendè, àcikwàtè. Mpindyewù, yèyè kèna ùtuucika ku ciibi aku bikolè to. Yèyè neàcìcimùnè ne neàcikwàtè. Neacìkòòkèshè. Aci cidì mu bukolè bwèndè sungasunga.

58 Mu Èkèleeziyà wa Nzambì udi ne mwoyi, mu dindà emu, mùdi mùsanganyibwa bukolè bwà kwondopa mabèèdi ònsò. Mu Èkèleeziyà wa Nzambì udi ne mwoyi mùdi mùsanganyibwa bukolè bwà kucimuna diteeciibwa dyònsò. Mu cyanza cyà Èkèleeziyà wa Nzambì udi ne mwoyi, mu dindà emu, mùdi mùsanganyibwa bukolè bwà kuswika mpèkaatù ne mùnyòòlolò ne kumwimansa, ne kupeta dibàtiiza dyà Nyumà Mwimpè, mu Èkèleeziyà wa Yesù Kilistò.

“Cyònsò cinùkààjingì, lòmbaayi mu Dîna Dyànyì, ne nebànùpèèshèci. Katanci kakèsè, ne bàà pa buloba (bàdi kabàyi Dimiinu abu, dimiinu didi kadiyi difùùlulula) kabààkuMmòna kàbìdi to. Kàdi nwènù nenùMmònè, bwalu Nèngiikalè neenù, munda mwènù mene, too ne ku ndekeelu kwà buloba.” Cinyì? Dimiinu dyà Bukalenge. “Byenzi bîNdi ngenza, nenùbyenzè pèènù. Nenjaadikè Mémè mwinè ne Ndi neenù, bwalu bimanyinu ebi nebifilè aba bàdi bìtabuuja.”

Yèyè neàkookeshè dimiinu dyà mwena lukunà wendè. Yèyè neàkookeshè. Dimiinu Dyèndè nedikookeshè ciibi cyà mwena lukunà wendè, nànsha ciibi ciikàle cyà bishi. Cyòcì bubèèdi, mateeciibwa, mpèkaatù, nànsha ciibi ciikàle cyà bishi, nciimuna. Ne Dimiinu dyà Abraham didi dicìkòòkèsha.

59 Kanwènaayikù ne disànkà, mu dindà emu, dyà kumanya ne tudi mpindyewu mu mùshindù wà biikàle batàmbe ne bacìmunyi anyì? Batàmbe ne bacìmunyi anyì! Kaa, kakwèna cintu nànsha cimwè cyà kulwila mvità to. Mvità mmijikè. Kashibà nkamana kwela. Dibèndelà dyàbàndi. Ne munkaci mwà mushiki wònsò wà mpèkaatù, munkaci mwònsò mwà cibambalu cyònsò cyà babèèdi, mùdi nkùrusè wa kale wa mabaya kaàyi makoona awu, mwasa kùdi Mashi a Yesù Kilistò, Mucìmunyi. Cintu cimwèpelè citùdi twenza nkwitabuuja, kutàngila ne kwikala ne mwoyi.

“Nèngiikalè neenù. Nènjaadikè. Bantu bàdi bàlwa mu matùkù a ndekeelu, bamba ne: ‘Kaa, èè, aci *civwàku*.’ Kàdi Nèngiikalè neenù. Ne bintu biinè bîNdi mwenzè, pa buloba apa ebi, Nèngiikalè munda mwènù, mwikàle ngenza cintu cimwècimwè aci. Dìbà adi nebàmanyè. Bòbò nebàMmònè. Bàà...Bantu Bàànyì nebàMmònè. Dimiinu dyà

Abraham nedìMmònè. NebàMmanyè. NebàNjingùlùlè. Bakwàbò nebàMbiikilè ne: ‘Beelèzèbùlà,’ ànu mwàkenzàbo amu. Kadi nenùMmanyè, bwalu Nèngiikalè neenù. NenùMmònè, nuMmòna ne mèsù ènù. NenùMmònè, bwalu Nèngiikalè neenù, too ne ku ndekeelu kwà buloba, bintu ànu bimwèbimwè bìndi Mèmè ngenza abi. Ewu udi ungiitabuuja Mèmè, byenzedi bìNdi ngenza yèyè neàbyènzè pèndè, cyenzedi cyà mùshindù wùm wèwùm wè awu.”

⁶⁰ Nènku, leelù ewu, Èkeleeziyà wa Nzambì udi ne mwoyi ùdi ne dyèsè dyà kwikala mwimàna ne kumòna mùdi mucimunyi, Yesù Kilstò Mwànà wa Nzambì udi ne mwoyi, mubiike ku lufù, mwimàne kaaba aka, mwikàle ne mwoyi mu Èkeleeziyà Wendè, wènza cintu cimwècimwè cyàkenzàYe musangu awu aci. Dìbà adi tudi tukòokèsha ciibi cyà mwena lukunà yònsò.

⁶¹ Wèwè ne mwena lukunà kampànda mu dindà emu, dìbà adi, wèwè mwanèètù, kùdi ànu, pawikalà Dimiinu dyà Abraham, paanyimà pàà wèwè muumvwè eci, kakwènakù démons bùngi bukumbàne mu ifernò yìdi mwà kushààla milamè ciibi aci kumpalà kwèbè to. Necikangukè. Cìdici nànshà ciikàle cinyi. Wèwè udi uyakù tàmàkàtàmàkà, bu Dimiinu dilaya, wamba ne: “Ndi nnana eci bu cyànyì mèmè. Eci ncyànyì mèmè, bwalu Nzambì wàkadicipa ne Yèyè ùvwa mwà kubiiisha Yesù ku lufù, ne, ku Yesù, mèmè mvwa mwà kucicimuna. Ndi ndwa mu Dìna dyà Mucimunyi awu, Yesù Kilstò. Alùkà cyànyimà. Ndi muswè kupita.” Amen. “Yèyè neàkookeshè ciibi cyà mwena lukunà.” Pashiiishe ujuuka mwaba awu, ne makaaya masàka paanyimà ne ngabu webè ùbàlakana, mubwikila kùdi Mashi a Mukalenge Yesù. Mwena lukunà neàcijingùlùlè.

⁶² Wèwè dijinga ne cintu, akulà Nendè mpindyewu patùdi tusambila apa, nwènù bàdi mwab’ewu aba, mu dindà emu, panùdi ne mitù yènù miinyika apu. Ne wèwè ne lukèngelu, udikù ànu mwà kwela cyanza muulu cyanààna kùdi Yesù anyi? Nènku cyàmbè ànu cyanààna mu mwoyi wèbè, mu mwoyi wèbè, wamba ne: “Mukalenge, Wèwè udi mumanyè lukèngelu lwànyì. Mpindyewu, nyewù ngùm vù, mu dindà emu, ne aci m’Bible ne: ‘Yèyè neàkookeshè ciibi cyà mwena lukunà.’ Nyewù ndwa bwà kukòokèsha ciibi aci. Pàmwàpa ndi ne ciiji. Pàmwàpa ndi lukèngelu ne Nyumà Mwimpè. Mpèkaatù nyewù mundamine panshi. Ndi mu lukèngelu. Kàdi nyewù ndwa ku ciibi aci mpindyewu. Nkàadi nya bwà kucyàngata, mu dindà emu, ciibi cyànyì aci. Pa nàнку, shiya njila, nyawù ndwa.”

⁶³ Mukalenge mubènèshìibwe, Wamònu byanza byònsò ebi. Ne Wèwè udi mumanyè ne eci n’Dìyì Dyèbè, Mukalenge. Mèmè ndi ànu muDitèèle cyanààna, ne muleejè ku Mifundu. Bantu bàà mu Bible, mwàkacimunàbo makalenge ne kwenzeja bwakàne, ne kujìma kapyà, lwonji lwà kapyà, ne bapàndùke ku lusongo lwà mwelè wà mvità, ne bakànge mukana mwà nyamà yà ntambwe, ne, kaa, ne kabiyi ànu abi to, bakàji bàakapetulula bafwè bààbò,

ne bintu byàbûngì, bwalu Wèwè ngwâkabilaya. Mmulayi Wèbè ne: “Dimiinu Dyèndè.” “Dimiinu dyèbè, Abraham, nedikookeshè ciibi cyà mwena lukunà.” Ne Wèwè utu ushààla mukwàte ku mulayi Wèbè.

⁶⁴ Mpindyewu bapèeshèku, Mukalenge, dijinga dyà mwoyi wàbò. Swàku bùumuke mwab’ewu muntu mushiilàngàne. Swàku bwà bàye, bamanyè ne bóbò—bóbò mbacimunyi, bwalu Dimiinu dyà Bukalenge dyàkabàcimwina. Mfùmù mwena Bamfùmù awu, pàakalwàYe, mulela kùdì virgò, Wàkacimuna mwena lukunà yònsò, ne lufù lwinè. Pa nàнку lufù lwólù lwinè kalwèna mwà kuciinyisha Dimiinu dyà Abraham to. Twètù tudi ne mulayi ne twètù mbààpyànà buloba, ne netwàlukile cyàkàbìdì mu mùshindù mutàmbe kwikala wà butùmbi, mu mubidi mutùmbishiiabwe, paanyimà pàà mwena lukunà wa ndekeelu mumanè kudyaciibwa mwinshì mwà dikàsà, mwà mwànà umwèpelè ne wa ndekeelu wa Nzambi wàbwela mu Bukalenge awu.

⁶⁵ Piikalàku aba bàdì ne byanza byela muulu, Mukalenge, biikàle bangènzàmpèkààtù, bàsungilèku. Aba bàdì munkaci mwà kutwà cimpingà, bàmanyishèku ne kabyèna bikèngela bwà kushààlabò batwè cimpingà to. Yèyè ùdì mwà kukòokesha ciibi cyà ditwà dyà cimpingà aci. Pàmwàpa ewu udi ne ciiji, wa ludìmi lwà—lwà ciipanshì, ne lukooyike, anyi wa mwoyi wà dyalakana, anyi wà lukùkà, lwà mfrangà, anyi—anyì cintu kampàndà cyà cikooyike, àmanyèku ne ùdì mwà kukòokesha ciibi aci. Pàmwàpa mbubèèdì, Mukalenge, ntàtu. Yèyè ùdì mwà kukòokesha ciibi aci: “Bwalu Yèyè wàkatàpiibwa mpùtà bwà dishipa dyètù dyà mikenji, muzaaza bwà bubì bwètù. Dinyooka dyà ditalala dyètù dyàkapòna pambidi Pèndè, ne ku mibùndàbùndà Yèndè twàkondopiibwa.” Tudi bacimunyi, mu dindà emu. Enzàku nàнку, Mukalenge.

Ne pa kuumusha byònsò abi, mudimu munènè wàkenzàYe awu, nànsha nàнку Yèyè ùdì neetù. Nànsha nàнку, Yèyè mmulayè ne Úvwà mwà kucyènza. “Katanci kakesè, ne bàà pa buloba kabààkuMmòna kabìdì to, kàdì nwènù nenùMmònè; bwalu Nèngiikalè neenù, munda mwènù mene, too ne ku ndekeelu kwà cikondo.” Ndi ndòmba, Taatù, bwà Wèwè kuDimwèneshakù kùdì muntu ne muntu, mu dindà emu. Bwalu tudi tulòmba nùнку mu Dìna dyà Yesù. Amen.

⁶⁶ Nudi nwitabuuja ne aci m’Bulelèlà anyi? Kakùyì tuseku to cìtábùùjaayi ne m’Bulelèlà, kakùyì mpatà nànsha yà kànà mu mwoyi wènù to. Mpindyewu vùlukààyi ànu cyòci eci. Nkwàcilu wa mudimu wà Nyumà Mwímpè mmupeepèle mu mùshindù wà wùbwejakaja meeji a mu mitù. Bintu bidì bitàmbe kwikala bipeepèle bínkààdikù. . . Nkààdi mumònèmònè Nyumà Mwímpè wènza cyòci eci. Mvwa ngamba bintu, mòna’s, bîmvwà nciyi mufwànyine kwela meeji ne bìvwa mùshindù awu to. Byòbì bikèngela mèmè kwàta mudimu ne meeji àanyi mèmè mwinè,

mvwà mwà kwamba ne: “Èè, aci kî ncifwànyine kwikala cyà bushùwà to.” Kàdi cidi misangu yònsò ànu cyà bushùwà. Yéyè ùdi wènza maalu mapepèlè ànu ètu a menemene aa. Ne Ùdi wènza bintu bwà kuDìmanyisha kùdi bantu Bèndè. Nzambì ùdi ne bantu Bèndè. Ùdi munkaci mwà bantu Bèndè. Yéyè mmubànangè. Ne Yéyè mmuswè kubènzela, ne kubàmbulwisha; ne kubàmanyisha ànu cyanààna, kaciyi *cyènza Ye* to, kàdi *cidi Ye* mwenzè. Ùkaadi mumanè kucyènza. Mbyèbè. Mbyèbè wèwè. Ndipà dyà kùdi Nzambì Taatù wetù dyà kùyi udifucila kantu to, kùdi Ekeleeziyà Wendè.

⁶⁷ Mpindyewu mùshindù mwinè wikalà meeji a mu mutù mwà kwikala makònyàngàlè's wè, bu mu matùkù a Danyèlè, ne mu matùkù a bânà bàà beena Ebèlù, ne—ne bààbùngi batwàmbì mu dindà emu abu. Nwamònu's, bantu banènè bàà meeji a mu mitù mu ditùkù adi bàvwa bakolè bwà kubàcimuna ànu mùdìbi mpindyewu emu. Citu misangu yònsò ànu mwena lukunà, bwà mùshindù wàbò bóbò wà dimòna, ne maalu àbò a mamanya a cyena-leelù ne bikwàbò, àvwa ànu makòdyàkàne ne bikwàbò, bwà meeji a musangu awu, bu mùdi ètù twètù leelù ewu aa. Nwamònu's, civwa ncintu cimwècimwè aci. Kàdi kùvwa, misangu yònsò, aba bàvwa bàpeta dikima dyà kushààlapù bàmba ne: “Nzambì mmulelèlè. Dìyi dyà Nzambì ndilelèlè.”

⁶⁸ Nènku, wèwè, kabyèna bikèngela bwà wèwè kucimuna to, bwalu Yéyè wàkacimuna. Cintu cimwèpelè cidi cìkèngela wèwè kwenza cidi ànu kuyakù, kwimana mu ciibi, kwamba ne: “Ncyànyì. Eci ncyànyì mèmè. Nzambì ngudi mulùmpèeshe, lupàndù lwànyì alu. Mèmè muswè Nyumà Mwimpè, Nzambì ngudi muMumpèeshe. Mulayi wùdi kùndi, kùdi bânà bèètù balela, bònsò bàdi kule, mu bùngi bwònsò bwàbiikilà Mukalenge abu.” Ki bwà cinyì ndi mwimàne. Ànu . . .

⁶⁹ Wànyì mudimu wà bwambi, wà dijingulula edi ne bikwàbò, newùjikè àbìdì aa mpindyewu. Kaa, newìkalè ànukù misangu yònsò. Kàdi necìfikishè ewu ku ndekeelu, bwalu wùyaaya too ne ku cintu kampàndà cyà citàmbe bunène. Nwamònu anyi? Wùdi wènda wùbànda; kuumuka ku dikwàtà dyà ku cyanza, too ne ku dijingulula, ne mpindyewu wùkaadi pa kwenza mukwàbò. Nwamònu anyi? Wùmònaayi. Wùtàngilaayi bwà nùmanyè ne mmulelèlè. Nwamònu anyi? Ndi mumanyè ne m'Bulelèlè. Ne newùtambè kudyunda, kudyunda, kutùmbuka, kwimpika. Bushùwà. Mòna's, Yéyè's ngwàkawùlaya. Ne cidiYe ùlaya, Ùdi ùcyènza. Yéyè kèna mwà kupangila mu mulayi Wèndè to. Nènku ncinyì aci? Bwikadi Bwèndè bùdi ànukù ne mwoyi pàmwè neetù abu, bwà kucimanyisha, bwà kukumanyisha ne Yéyè mmukukwàcile ciibi aci.

⁷⁰ Yéyè ùvwa Dimiinuu dyà Bukalenge. Muntu nànsha umwe kàvwakù mwà kukwàtà biibi abi to pa kuumusha Yéyè. Bàà kale bònsò abu bàvwa mindidimbì yà dilwa Dyèndè. Kàdi pàakalwàYe, cyàkamana mvità yònsò nkòong. Mvità

yàkajikila ku Getsèmànè ne ku Kàlvaryò. Nènku mpindyewu tudi ànu biimàne cyanààna, bu bacimunyi. Kakwèna mvità yà dilwangana nànsha mikesè to. Twètù. . . Mvità mmijikè. Tudi ànu bacyängàte cyanààna, mukàndà wàci wà bwena cintu. Cishindikiki cifùnda kùdì Nzambi, Taatù wetù, Wàkajuula cyanza Cyèndè muulu awu, mwambè ne: “Ndi ndicìpila ku Mèmè mwinè ne Dimiinu dyèndè nedikookeshè ciibi cyà mwena lukunà.” S’ki cyòci aci. Ncimana kukwàta. “Wàkatàpiibwa mpùtà bwà dishipa dyètù dyà mikenji. Ku mibùndàbùndà Yèndè *twàkondopiibwa*.” Ncimana kwenza. Mmudimu mumana kujikija. Tukàadi ànu naaci bu cyètù. “Ne byenzedi bìNdì ngenza, nenùbyènzè pèènù.” Mfùmù ùdi neetù, mu dindà emu. Mabènesha Èndè manène awu, Nyumà Mwímpè, mwikàle ùkwàta mudimu pambidi pèètù. Pa kuumvwa njiyà yà butùmbi ayi, pa kumanya ne cidi ànu menemene ne. . . cipetangana ne Dìyì dyà Nzambi. Cidi citùpèèshaa disàmbiibwa dilenga dyà dikèma, dyà kumanya ne— ne Nzambi n’Taatù wetù.

⁷¹ Mpindyewu, ngeela meeji, mm—mmwabànyè twartà twà disambila mu dindà emu anyi? Mvwa mumwambile ne, èyo, kwòkò kwitàle ànu beena mu tabernacle cyanààna, èè, kààbanyì twartà twà disambila to. Kàdi kwòkò—kwòkò bantu batwè ku dikùmi, dikùmi ne bàtaanu, anyì cintu kampànda, beenyi bàdì batwèndèle, mòna’s, bwà kwabanya twartà twà disambila, bwà twamòna mwà kulwa naabò bwà kubàsambidila. Nganyì udì mwenyi udi neetù mu dindà emu? Elà cyanza muulu. Kaa, ekelekele! Bushùwà’s. Bàdikù dikùmi ne bàtaanu anyì makùmi àbìdì. Èyo. Netwèleshè twartà twà disambila etu mulungo ne kubàfikisha ku cibùmbà cyà ku cyambilu. Nwamònu’s, cingàmbidì bwà beena “tabernacle”, bòbò bàtu kaaba aka.

⁷² Dijingulula edi, vùlukàayi ne, ndi ngamba nùku nùku ne, àbìdì aa dijingulula nedifikè ku ndekeelu, nekwikalè cintu kampànda cyà citàmbe bunène ne citàmbe bwímpè, cidi mu njila. Kùvwa, cindì mumanyè, ndi mmòna ne nudi nutàngila bânà beetu bàbìdì bàà balùme mpindyewu, bàvwa biimàne naanyì makèèlèlè awu, pàvwàci cyenzèke apu, nwamònu’s, ne dyàbwàbwa, pàvwàci cyenzèke apu. Ne ncyenzèke misangu yisàtù milondàngane, mpindyewu, yidici cyenzèke, dishindika dyà ne cidi pabwìpi mpindyewu mene, nwamònu’s, cikaadi pa kwenzeka.

⁷³ Mpindyewu, Mukalenge, Wèwè ngudi Nzambi, ne twètù tudi basadidi Bèèbè. Tudi tuKwela twasàkidila bwà Dìyì Dyèbè, bwà Nyumà Mwímpè, Udi mubènèshe myoyi yètù. Nènku mpindyewu tudi ne disànka. Tudi basòmbe mwab’ewu, bamanyè ne tudi bacimunyi. Tudi bamanè kukòokesha biibi byà mwena lukunà byònsò. Mbimana kutùpèèsha, ne twètù tudi ne nsapì munène awu mu cyanza. Dìna dyà Yesù Kilistò kadyàku- . . . nedikangulè ciibi cyònsò cyà mwena lukunà. Angàtaayi nsapì ewu, nsapì wa Dìna dyà Yesù, ne nù- . . . nùkangulè ciibi cyònsò cyà mwena

lukunà cidiye munùswike naaci bwà nwikalè kule ne mulayi kanà wònsò.

Nènku, Nzambi, mu dindà emu nyewù tulwa mu Dîna dyà Yesù, ne nsapi ewu, bwà kukàngwila babèèdi ne beena ntàtu biibi abi. Bwalu mbifùnda mu—mu Dîyì Dyèndè ne: “Mu Dîna Dyànyì bôbò nebiipaté baadémons. Nebàakulé mu myakulu mipyamìpyà. Ne bôbò bakwàte nyòka ne byanza, anyì banwè cintu cyà cishebeyangana, kabyàkubenzela bwalu to. Nebàtentekelè babèèdi byanza ne babèèdi nebàsangalè.” Tudi bamanyè ne bintu abi mbilelèlè. Nènku enzàku, mu dindà emu, Mukalenge, bwà bôbò, bantu aba biikalèku mwà kucimòna, ku dimwèneshiibwa dyà Dîyì divwijibwe mubidi ne disòmbèle munkaci mwetù adi, ne: “Wàkatàpiibwa mpùtá bwà dishipa dyètù dyà mikenji; ku mibùndàbùndà Yèndè twàkondopiibwa.” Nènku swàku bwa bàcítàbè ne bòndopiibwè, mu dindà emu, ku mabèèdi àbò ónsò ne ku màsaamà ne ntàtu. Tudi tulòmba nùnkù mu Dîna dyà Yesù. Amen.

⁷⁴ Swàku, Teddy, wímbè *Itàbùùjà Nàka*, mu cimùmà ne bitùùlùbitùùlù, bu wèwè mwà kuswà.

Nènku cinyi? Udi mubangile ku umwè anyi? Nombà umwe, kartà kàà disambila. Ùmwè, ibìdi, isàtù, ìnaayi, ìtaanu, isambòmbò, mwandamutekète, mwandamukùlù, citèemà, dikùmi, anyì cyònsò ciikalàku aci. Èyo. Swàyi ànu mu cimùmà, bu nwenù mwà kajuuka, nùvwilè ku elu luseke.

[Mwanèètù wa balùme kampànda ùdi wàmba ne: “Udi mubiikile bàngà?”—Muf.] Huh? [Muntu kampànda ùdi wàmba ne: “Kwàjiki. Kwàjiki.”] Batwè ku. . .

Tùmonèbi, nombà umwe, nombà ibìdi. Nganyì udi ne kartà kàà disambila nombà umwe? [Mwanèètù wa balùme kampànda ùdi wàmba ne: “Mémè ngudi naakù.”—Muf.] Èyowà. Nombà ibìdi. Èyo, mukalenge. Nombà isàtù, nombà ìnaayi, nombà ìtaanu, nombà isambòmbò, nombà mwandamutekète, nombà mwandamukùlù, nombà citèemà, nombà dikùmi.

⁷⁵ Pàcidibò bàlonda njila ne bàngata myaba yà kwimanyinabò apu, ndi muswè kwelakù lukonko kampànda kùdi bakwàbò bàà kunùdi. Mbanganyì bàdiku, beena mu tabernacle emu, bàdi bàsaamà? Beena mu tabernacle, elàayi byanza muulu. Batwè ku bàtaanu. . . bànaayi, bàtaanu, bàsambòmbò, mwandamutekète, mwandamukùlù. Byanza mwandamukùlù anyì citèemà. Kùdikù muntu kampànda mu tabernacle emu, udi kàyi wa mu tabernacle emu, biikàlè beenyi kutùdi, nànsha byòbì ne nudi bafwànyine kwikala babwèlè paanyimà pàà disangisha nènku kùyi mupetè kartà kàà disambila anyi? Udikù mwà kwela cyanza cyèbè muulu anyi? Muntu kanà yònsò udi mwà kwikala dijinga ne Nzambi, udi kàyi. . . utu—utu kàyi ùlwa ku tabernacle ewu. Muntu kampànda udi kàyi cidimba cyà tabernacle ewu, kàdi—kàdi wèwè mwikàle usaama kàdi kùyi ne kartà kàà disambila

to, mwikàle muswè bwà bàkuvùlùkè mu disambilà? Udikù mwà kwela cyanza cyebe muulu anyi, muntu yònsò? Èyo. Abi mbîmpè. Èyo.

⁷⁶ Mpindyewu ndi muswè kulòmba ní nudikù mwà kwikala ne kaneemu ne mwènù mwònsò, ànu bwà—ànu tusunsa tukesè cyanààna, nènku pashiishe netùbangè dyàkàmwè ne kubanga. Mpindyewu twànji tùmónàayi. Mmyaba bûngi kaayi yùdi mushàale naayi kuntwaku, Billy? Èyo. Kùdi aku kùdi udi mupetè nombà dikùmi anyi? Ndi mubiikile ùmwè too ne ku dikùmi.

Dikùmi ne ùmwè, dikùmi ne ibidi, dikùmi ne isàtù, dikùmi ne inaayi, dikùmi ne itaanu, bàjuukilè kuulu mpindyewu. Bòbò ne nòmba dikùmi, dikùmi ne ùmwè, dikùmi ne ibidi, dikùmi ne isàtù, dikùmi ne inaayi, dikùmi ne itaanu, bàjuukilè kuulu. Èyo. Ùmwè, ibidi, isàtù, inaayi, itaanu, isambòmbò, mwandamutekète, mwandamukùlù, citèemà, dikùmi, dikùmi ne ùmwè, dikùmi ne ibidi. Nkupangike mikwàbò mitwè ku yibidi, kuumukila ku ùmwè too ne ku dikùmi ne itaanu. (. . .? . . . mwandamutekète, mwandamukùlù, citèemà, dikùmi, dikùmi ne ùmwè.) Dikùmi ne itaanu, dikùmi ne isambòmbò, dikùmi ne mwandamutekète, dikùmi ne mwandamukùlù, dikùmi ne citèemà, makùmi àbidi.

⁷⁷ Kaa, anji indilaayi kakesè. Mwva—mwva mumwambile bwà kufila twartà twà disambila ànu kùdi bantu bàvwà kabayi bàà mu tabernacle. Aci mmwòmò. Nwamònu anyi? Bwalu, ncifwànyine kwikala, nwamònu's, dijingulula. Bantu bàdi bàmba ne: “Bantu aba's batu bàlwa ku tabernacle.” Nwamònu anyi? Ndi—ndi nwàmbila. Mbanganyi bàkaavwàku kaaba aka . . . bàtù kabàyikù banji kwikala kaaba aka kwònsò eku? Tùmónèbi cyanza cyèbè, muntu utu kacya kàyiku mwanji kwikala mu òmwè dyà ku masangisha àanyi kwònsò eku. Èyo. Èyo.

Mpindyewu, èyo, anji indilàbi kakesè cyanààna, Mwanètù Teddy.

⁷⁸ Mpindyewu ndi mufwànyine kwamba nùnkù ewu, ne, nwènù bònsò nukàadikù bumvwè bwà masangisha, mùdiwu ènzeka, nànsha nànkù, s'mmwòmò's, bantu bònsò bàkaadiku babwelè mu masangisha abu? Nwamònu anyi? Pàvwà Mukalenge wetù Yesù pa buloba, Yèyè kàakambakù mùvwà Ye mwondopi nànsha. Ùvwa Dimiinu dyà Abraham, cyà bushùwà, ne Yèyè ùvwa ne mulayi mwikàle Nendè. Yèyè wàkamba ne Kàvwa wènza cintu nànsha cimwè pàvwà Taatù kàyi muMuleejè to. Aci mmwòmò anyi? Ne Wàkamba ne: “Ncyèna mwà kwenza cintu nànsha cimwè pàdi Taatù kàyi muNdeejè cyà dyaenza to.” Ne Yèyè ùvwa ùcimwèna ku . . . Kabiya “pàdi Taatù kàyi *ùNgambila*” to. “Pàdi Taatù kàyi *uNdeejà*.” Yone Munsantu 5:19: “CìNdi mmòna Taatù wènza aci, ki cidì Mwànà wènza pèndè.”

⁷⁹ Mpindyewu pààkalwàYe—pààkalwàYe, tudi tusangana ne, ku ntwàdijilu kwà mudimu Wèndè wà bwambi, paanyimà pàà dyangata Dyèndè dyà—dyà nkwasà wa Davìdì. . . [Katùpà kàà mukàbà wà mèyì munda mutupù—Muf.] Mu ngaakwilù wa mu nyumà, kùdì. . .

PààkaMwikilà Nyumà Mwîmpè ku dibàtijiibwa, kùdì Yone, ki pààkalwàYe Maasiyà mullaaba. Mpindyewu, vùlukàayi ne, Yèyè ùvwa Mwànà wa Nzambi pààkalediibwàYe. Ùvwa Mwànà wa Nzambi mulela kùdì virgò. Kàdì pààkalwàYe Maasiyà, mpààkalwà Nyumà Mwîmpè pambidi Pèndè, bwalu *Maasiyà* mbwena kwamba ne “mullaaba.” Nwamònu anyi? Nènku Yèyè ùvwa Mullaaba awu pààkalwà Nyumà Mwîmpè pambidi Pèndè. Nukàadi bangumvwè nyiisha pa *Mwànà Wa Mùkòòkò Nè Nkuci*. Dìbà adi tudi tusangàna ne, pàvwàYe. . . Paanyimà pàà matùkù Èndè makùmi ànaayi a diteeciibwa, Wàkapàtuka.

⁸⁰ Nènku mudimu Wèndè wà bwambi wàkabanga bishi, ne wàkajika bishi? Tudi tusangana ne, mu mudimu Wèndè wà bwambi kùvwa muntu dìnà dyèndè Andèlè, wàkaya kasangana mwanàabò wa balùme, Simonà, mulòbi, ne kulwayè nendè kùdì Yesù. Ki Yesù kumwambilaYè, ne: “Dìnà dyèbè n’Simonà. Dìnà dyà tatwèbè n’Yona. Kubangila ku leelù neùbiikidiibwè ne *Peetèlò*, mbwena kwamba ne ‘kaadibwe kakesè.” Nudi bavùlùke aci anyi? Nènku muntu ewu wàkakèma bikolè bwà cyàkamwambilà Yesù aci!

Mpindyewu, ki cyòci aci cìvwà Maasiyà ne cyà kwenza anyi? Mbanganyi bàdì bamanyè nànkù awu, bàmbè ne: “Amen.” Bìvwa bikèngela kwikalaYè Nzambi-Mupròfetà. Èyowà’s, mukalenge. Mòsà wàkamba ne: “Mukalenge Nzambi webè neàjuulè Mupròfetà mufwànangàne naanyi. Nebyènzekè ne ewu wàbènga kutèèleja Mupròfetà awu awu neùmushiibwè munkaci mwà cisamba.”

⁸¹ Mpindyewu, dìbà adi patùdì tujandulà, pashìshe ne, Wèndè. . . “Yèyè wàkalwa kùdì bàà Kwàbò Sungasunga.” Abu bàvwa mbanganyi? Beena Yudà, ku cifùkìlu. “Nènku bàà Kwàbò Sungasunga kabààkaMwakidila to,” pa nànkù Yèyè ùvwa dìbà adi ne. . . Mpindyewu bikèngela bwalu bìyè kùdì bàà Bisàmbà byà bendè, nwamònu’s, bwalu bàà Kwàbò Sungasunga kabààkaMwakidila to. “Kàdì mu bùngì bwònsò bwà bààkaMwakidilà abu, Yèyè wàkabàpèèsha bukolè bwà kulwabò bânà bàà Nzambi.” Pa nànkù mpindyewu Yèyè mmukùdimùkile kùdì bàà Bisàmbà byà bendè, ne ùdikù, kacya bidimu binunu bìbìdì. Kàdì mpindyewu mònaayi bintu bìdìYe mwenzè.

⁸² Pashìshe Filipò, paanyimà pàà yèyè mumanè kumòna cyòci eci cyenjìibwe, kùyayè kasangana Natànàèlà, ne kulondelayè Natànàèlà bwà Ewu uvwayè mupetè ne cìvwàYe mwenzè. Ki aci kumukèmeshaci. Kuciitabuujayè ànu ne lutàtu’s. Kàdì

mmwenzè ànu ùbwela mu Bwikadi bwà Mukalenge Yesù, pààkapetàye mwaba wùvwàYe ùsanganyiibwa, kubwelayè mu Bwikadi Bwèndè, Yesù kwambaYè ne: “Mònaayi mwena Izàlèèlà mwena munda mùdi kamùyì budimù.”

⁸³ Mpindyewu, bu ne wèwè awu uvwa mwimàne mwaba awu, udi wela meeji ne uvwakù mufwànyine kwikala wa nyumà menemene bwà kwikala muumvwè ne Yèyè ùvwa Nganyi anyi? Udi wela meeji ne wèwè uvwa mufwànyine kwikala mucyènzè anyi? Mpindyewu tàngilààyaaku. Nwamònu anyi? Muntu awu, ànu Mwenyi wetù ewu, mulòb-...mwaba awu, Ùvwa mufwànyine kwikala mulòbi. Yèyè ùvwa Mukoonyi wa mabaya, ki civwàYe. Muntu mukoonyi wa mabaya ùvwa mwimàne mwaba awu, Muntu mushindàme. Muntu ki yèyè ewu pwàà. KumutàngilaYè, byenzè bu umwe wa ku bantu bàdi apa aba, kwamba ne: “Mònaayi mwena Izàlèèlà mwena munda mùdi kamùyì budimù.” Èè, mmunyi mùvwàYe mufwànyine kumanya ne ùvwa mwena Izàlèèlà? Kàkùvwa nku mùshindù wùvwàye muvwàle to, bwalu bònsò bàvwa bavwàle ànu mùshindù wà mwomùmwe. “Mwena munda mùdi kamùyì budimù.” Mmunyi mwàkamanyàYe ne kàvwa muntu wa—wa budimù?

⁸⁴ Pa nàнку kukèmeshaci muntu awu. Bu mùvwàye mwena kwitabuuja mulelèlà, kwambayè ne: “Laabi,” anyi mwanèètù, muyiishi, mulongeshi, “ukààdikù Wèwè ewu mummòne díbà kaayi?” Nwamònu’s, yèyè nguvwa uMwela lukonko awu.

⁸⁵ Yèyè ne: “Kumpàlà kwà Filipò kukubiikilayè, paùvwà mwinshì mwà mucì apu, Mwva mukumòne.”

Yèyè ne: “Wèwè udi Mwànà wa Nzambì. Udi Mfùmù wa Izàlèèlà.”

⁸⁶ Yesù kwambaYè ne: “Bwalu Ngààkwambìdì cyòcì eci, mpindyewu wàNgiitàbùùjì’s? Kàdi neumonè bintu bitàmbe eci bunène.”

⁸⁷ Nèнку ki bwà cinyi ndi ngiitabuuja ne Èkèleeziyà wa Nzambì udi ne mwoyi neamonè cintu cinène kutàmbe eci. Cìdi pabwìpì ne kubwelamù mpindyewu, katancì aka, nwamònu’s, bwalu bācītābūūjì. Aba bàdi bacibènge, bwà mikàlù yà cyenamàngumba, ndi ngeela mpatà bwà ne bòbò bààdyàkwitabuujakù cintu kampànda. Nwamònu anyi? Bintu...Anyi nennwèndelè mu Bukènkè anyi nenwìkalè bampofò. Bukènkè bùtu bùfofomija, anyi bùleeja kajila.

⁸⁸ Tunyuunyi tukesè, mùmvwà musangàne, ku Lupìngù lwà Budishikaminyi. Ikàlà mutwishiiibwe bwà kalùbandila, Mwanèètù Thoms, paùdì uyakù apu, wamònu’s. Tùdi tùdìpanda mitù, kuntwaku. Kì mèmè kwamba ne: “Bwalu bùvwa cinyi?”

⁸⁹ Yèyè ne: “Pamutù pàà kulonda bukènkè, mu mvùla wa cipùpu amu, kuya ku dikùbiibwa, twòtò tùvwa tùteeta kutuuta ne kujìma bukènkè abu. Kì kudìshipatù’s.”

90 Ki cintu cimwèpelè cidi cyènzekà paùdi ulwangana ne Bukênkè, udi udishebeya wèwè mwinè, mu nyumà. Endèlaayi ànu mu Bukênkè bu mùdiYe Yèyè mu Bukênkè, dībà adi netùpetè bwobùmwè muntu ne mukwèndè, èkèleeziyà yònsò neyitabuujè ne neyitungunukè ne neyisankilè mabènesha a Nzambi. Aci kí ncifwànyinekù kwikala cilenga anyi?

91 Tàngilàayi mukàji wa beena Sàmaalèyà awu pàakalwàye. Kàdi, ùvwa mwena Sàmaalèyà (kàyi mwena Yudà to), mwena Sàmaalèyà. Ki Yèyè kwamba ne: “Ntwàdìlèku màyi à kunwà.” Ki muyiiki kutùngunukawù.

Eci mpindyewu mbwà beenyi.

92 Ki muyiiki kutùngunukawù. Mpindyewu, kàvwa mumanyè ne Yèyè awu ùvwakù Maasiyà to. Ùvwa ànu Muntu wetù—wetù ewu, mwena Yudà. Nudi numòna mwàkanjìye kwamba anyi? Wàkamba ne: “Mòna’s, kacitu cilèlè bwà nwènù beena Yudà kuyiikilangana ne mukàji mwena Sàmaalèyà mùshindù ewu to.” Yèyè ne: “Katùtu tupetangana neenù to.”

93 Yèyè ne: “Kàdi bu wèwè mumanyè ne ùdi wakula nendè ewu Nganyi, wèwè’s nguvwa mwà kundomba Mémè màyi a kunwà. Nùku Mémè nguvwa mwà kukutwàdila, kukupèesha wèwè màyi, bwà kùyi ulwa apa bwà kusuna to.”

94 Mòna’s, kwambayè ne: “Mpindyewu anji indilà kakesè.” Yèyè ne: “Twètù tutu tukuukwila ku mukùnà ewu, kàdi—kàdi nwènù beena Yudà nutu nukuukwila ku Yèlusàlèmà.”

95 Yesù kwambaYè ne: “Kàdi dībà dilwalwa di—dinwikalà kanùyi nukuukwila ní nku Yèlusàlèmà ní nku mukùnà ewu to, kàdi mu Nyumà. Bwalu Nzambi ùdi Nyumà, ne bàdi bàMukuukwilà bàdi ne cyà kuMukuukwila mu Nyumà ne mu Bulelèlè.” Nwamònu anyi? Èè, ki Yèyè kutùngunuka, kuya ne muyiiki too ne pàakajandulàYe civwà lutàtù lwèndè. Ncinyi, nudi bamanyè mwaba wùvwà lutàtù lwèndè anyi? Kùdikù muntu mumanyè lutàtù lùvwà naalù mukàji wa ku ciinà cyà màyi awu anyi? Ùvwa ne balùme bapitèpite bungi, kí mmwòmò anyi? Ki kumwambilaYè ne: “Ndà kangàtè bàyeebè kàdi ùlwe mwab’ewu.”

Yèyè ne: “Ncitu ne bàyaanyi bwàlà.”

96 Yèyè ne: “Bwà aci ncyà bushùwà. Ukàadi mubàpetè bàtaanu, ne ùdi musòmbe nendè mpindyewu awu kí ngwebè to.”

97 Yèyè ne: “Mukalenge!” Mpindyewu tàngilàayi nùmonè mukàji awu. “Mukalenge, ndi njingulula ne Wèwè ewu udi Mupròfetà.”

Nwènù baalùkile ku màyi a kumpengà kwà dibèji awu, s’nenùjandulè. “Mukalenge,” mu nkùdimwinu wa ntwàdijilu, “Wèwè, ndi njingulula ne, Wèwè udi Mupròfetà awu.” Vùlukàayi ne, mu Bible, mbatùngunùke ne kwamba ne: “Mupròfetà awu,

Wèwè ngudi ‘Muprofeta awu’ anyi?” Ûvwa m’Mupròfeta kaayi awu? Uvwa Mòsà mwambè ne neàjuukè awu.

“Ndi njingulula ne Wèwè ewu udi Mupròfeta. Mpindyewu, twètù tudi balongèshùbwè, ne tudi bamanyè ne pààlwà Maasiyà, Yèyè ngwènza maalu aa.” Aci cìvwa ncimanyinu cyà Maasiyà. Ncyà bushùwà anyi? Cyà kumanya cìvwa lutàtù lwèndè. Yèyè ne: “Tudi bamanyè ne pààlwà Maasiyà, Yèyè ngwatwàmbila maalu aa. Kàdi Wèwè udi Nganyi?”

Yèyè ne: “Mémè ki Yèyè awu, udi wakula neebè ewu.”

⁹⁸ Kushiyaè mulòndò wèndè wà màyi awu, kubwelayè lubilu mu cimenga, mündi ndifwànyikijila ne, kacya ànu wàkwàta mwoyi, ne wàmba, mutèèke byanza pa cyàdi mwikàle ànu wènda ùtùpika, wàmba ne: “Lwâyi, kanùmonàayi Muntu Udi mungambìle bintu bìndi mwenzè. Wàwa kî m’Maasiyà mwinè anyi? Kî n’Yèyè mwinè udi Bible mwambè ne ngwàlwa awu anyi? Mmwena Yuda musòmbe mwaba awu, ànu Muntu wetù wa pàtupù ewu, ùmwèka ànu bu mukoonyi wa mabaya. Kàdi mMungambìle ne nkààvwa ne balùme bàtaanu, ne nwènù bônso’s nudi bamanyè ne aci mbulelèlè. Ewu ùdi ne cyà kwikala ànu Maasiyà.” Ncyà bushùwà anyi?

⁹⁹ Mpindyewu, Yesù wàkamba ne: “Katanci kakesè, kaacipòlò kakesè kàà cikondo, bàà pa buloba kabààkuMmòna kàbìdi to. Kàdi, nwènù nenùMmònè, bwalu Nèngìikalè neenù, munda mwenù mene. Ne byenzedi bìNdi ngenza nenùbyènzè pèènù. Byàbùngì mene kutàmba bìngénjì Mémè mwab’ewu ebi, nenùbyènzè, bwalu Ndi nya ku Taatù, ngaalukila ku mmwènekèlu wa Nyumà.”

Mulàmbù mmufucìbwe. Dimiinu dyà Bukalenge dyàkafwà; Dimiinu dyà Bukalenge dyàkabìika ku lufù. Mpindyewu Èkèleeziyà ùdi mu mùshindù wà mubingìshùbwe, mu kwitabuuja kwà cyòci aci, ne Dimiinu dyà Bukalenge didi mwà kubwela munda mwà bantu aba ne kubàvwija mene bapyànyì pàmwè, bàna bàà balùmè ne bàà bakàji bàà Nzambi.

¹⁰⁰ Mpindyewu, kùdi nwènù bakwàbò bàdi aku abu, bàdi kabàyi mu mulongo wa babèèdi ewu abu, mvwa mumwambìle bwà kufila twartà ànu kùdi bantu bàdi. . . pàmvwà mumubìikile mu dindà emu. Yèyè ngùvwa mumbìikile, wàmba ne: “Udi muswè bwà kuya kaabanya twartà anyi, papa?”

¹⁰¹ Mémè kwamba ne: “Kwòkò bantu batwè ku dikùmì bàà kabàyi bàà mu tabernacle to.”

¹⁰² Mpindyewu, misangu mikwàbò mu tabernacle ntu mbìikila ne mbàpèèsha twartà twà disambila. Wèwè udi walukila, wamba ne: “Èè, yèyè’s ùvwa mubàmanyè. S’bàvwa bàà mu tabernacle. Yèyè’s ùvwa mumanyè lutàtù lwàbò. Bushùwà’s.”

103 Pashiishe nkùdimuka, ngamba ne: “Ànu aba bàà pambelu pàà tabernacle, bàlwe. Èyo. Nwènu bàà pambèlù pàà tabernacle, nwènu mbààbwelà mu mulongo wà babèedi.”

104 “Kaa, katùvwa babàmanyè to,” mwàkambà tabernacle. “Katwèna bamanyè civwà lutàtù lwàbò to. Mmufwànyine ànu kwikala ùshima pa bwalu abu’s.” Nwamònu anyi?

105 Pashiishe ngamba ne: “Muntu nànsha umwe kàlu to. Nyumà Mwìmpè àsungule ànu aba bàdì munda emu aba bàdì kabàyi bàà mu tabernacle abu, basòmbe ànu mwab’awu.” Nànsha nànkù, nudi ànu . . .

106 Kakwènakù mùshindù nànshà wùmwè to, wà kufikisha muntu kùdì Nzambì, pàdiye kàyi mwànà wa Nzambì mudyànjlila kulongolola. Kakwènakù mùshindù nànsha wùmwè wà kucyènzà to. Yesù wàkamba ne: “Muntu nànsha umwe kèna mwa kulwa kùNdì pàdì Taatù Wanyì kàyi mumukòke nànsha.” Ne aci m’Bulelèlè. Byònsò byàkenzàYe, kùvwa cintu kampàndà cìbèngangana. “Yèyè ní wàkacyènzà mùshindù *ewu*, civwa ne cyà kwikala mùshindù *ewu*. Ne mùshindù *ewu*, civwa ne cyà kwalukila mùshindù *wàwa*.” Nwamònu’s, cìdì ànu bupidyà. Kàdì lungènyi ndubingìshìlwe kùdì bânà bààlù. Pa nànkù, nwènu, nudi bamòne.

107 Mpindyewu kaaba aka, ndi mèmè nteeta kwambila disangisha dyà—dyà bantu edi, edi ne, Yesù Kilistò nguvwà Dimiinu dyà Bukalenge adi. Kì ntwètù nànsha; n’Yèyè. Twètù tudì ànu bapyànyi bàà cyòci aci cyanàànà, kàdì bintu byònsò mbyètù twètù. Anji ambàbi tũng bu ne wèwè uvwa mwimàne mwaba awu ditùkù dyàkalwà Simonà adi? Ne, wèwè, muntu nànsha umwe. . . Eci ki cintu cyà kumpàlà cikaadiYekù mwenzè.

108 Mpindyewu, neciikalè cintu cyà kumpàlà bwà bantu aba, bu Yèyè mwà kucyènzà. Bòbò kacya kabàtukù banji kucimòna kwònsò eku to.

109 Kàdì pàakaseemenà Simonà, mulòbi wa kale, kàyi nànsha ne kàlaasà kiinè kalonga bwà kufùnda dìnà dyèndè pa dibèji to. Bible mmwambè ne yèyè uvwa “mupangi ne kàyi mulongè mukànda to.” Ne mmutwàngaji. Byònsò bibìdì, “mupangi ne kàyi mulongè mukànda to.” Ne pashiishe pàakaseemenàye, mu cimanyinu, bukolè. . . Yesù, Yesù kwambaYe ne: “Dìnà dyèbè n’Simonà.” Udikù wèwè wela meeji ne yèyè wàkeela meeji kaayi? Uvwakù mufwànyine kwikala mwelè meeji kaayi bu ne wèwè uvwa mwimàne mwaba awu? “Ne dìnà dyà tatwèbè n’Yona. Ne kubangila ku leelù neùbiikidiibwe ne Peetèlò.” Ncinyi—ncinyi cyùvwàku wèwè mufwànyine kwikala mwelè meeji? Muntu awu uvwa ubala mu meeji èndè anyi? Èè, ncinyi cyùvwàku wèwè mufwànyine kwikala mwelè meeji? Uvwakù wèwè mufwànyine kwelà meeji ne aci civwa cimanyinu cyà Maasiyà anyi?

110 Piiikalàbi ne cyòci aci ncimanyinu cyà Maasiyà mu cikondo cìmwèpelè, s’bikèngela ciikalè cimanyinu cyà Maasiyà, mu

cikondo ciibìdì, mu cikondo cisâtù, mu cikondo cìnnâyi's. Bidi bikèngela bwà cikondo ne cikondo cyònsò cùikalè cyà mwomùmwe, bwalu Nzambi kèna mwà kushintuluka nànsha. Ne mbanganyi bàdì bamanyè ne Maasiyà ùvwa n'Nzambi? Bushùwà's. Ùvwa m'Mulaaba awu. Bushùwà's. Pa nàнку Yèyè kèna mwà kushintuluka to. Bikèngela Yèyè ikalè umwèumwè awu.

¹¹¹ Ki bwà cinyi byàkakèngela bwà kuflaYe bujaadiki bwà cintu cìmwècimwè aci kùdì beena Sàmaalèyà bwàkafilàYe kùdì beena Yudà abu. Bwalu, bisàmbà bisâtù byà bantu abi bìdì beena Ham, beena Sem, ne beena Yafètè; beena Yudà, bàà Bisàmbà byà bendè, ne beena Sàmaalèyà.

¹¹² Mpindyewu, nudi numòna Nyumà Mwímpè anyi? Mbanganyi bàdì bamanyè ne Peetèlò nguvwa ne nsapì yà Bukalenge? Nukààvwakù bamòne anyi? Wàkabùkàngwila beena Yudà, mu Ditùkù dyà Mpenta. Filipò wàkapweka e kuyiishayè beena Sàmaalèyà, ne wàkabàbàtiiza mu Dìna dyà Yesù Kìlistò, kàdì Nyumà Mwímpè kàvwa mwanjì kubàpwekela to. Bìvwa bikèngela bwà kutùmabò muntu àkangàtè Peetèlò, wàkabàtentekela byanza ne kupetabò Nyumà Mwímpè awu. Ncyà bushùwà anyi? Ne kwà Kòneeliyò, bàà—bàà Bisàmbà byà bènde bààkaMupeta. Ki cyònsò cìvwàku ncyòcì aci. Kuumukila ànu apu, mbukàngwila bònsò mpindyewu. Nènku ki bwalu mbwòbù abu's, nwamònu's, bìvwa bikèngela bwà Yèyè àbùkàngulè. Nzambi ùtu ne mishindù yà dyanza maalu.

¹¹³ Mpindyewu, mu dindà emu, piikalàbi ne Yèyè ewu Wàkapèesha Dimiinu adi Mulayi, ne piikalàbi ne dimiinu ndisòmbe kaaba aka . . . Ndi muswè kwitabuuja ne ki cìdì yònsò wa kunùdì. Piikalàbi ne Dimiinu adi ndimonè Mulayi awu. Mpindyewu, yònsò wa ku bantu bàdì biimàne kaaba aka aba wèdì byanza muulu ne, kacya kàtukù mwanjì kubwela mu masangisha kacya kwònsò eku to. Mbeenyi kùndì. Mèmè ncyèna mumanyè nànsha umwe wa kùdìbo to. Mbabwelè pàabò ànu nàнку. Ne kùkaadi ndambù wa tusunsa, Billy mmubàpèeshe kartà kàà disambila, nènku ki bòbò aba biimàne kaaba aka. Kùdì bààbùngì kunùdì aku bédì byanza muulu ne, kanùvwa ne twartà twà disambila to, ne nuvwa ànu beenyi kaaba aka. Aci kacayèna naaci bwalu nànsha. Itàbùùjà ànu ne udi mupyànyi wa mulayi awu. Itàbùùjà ànu ne ku mibùndàbùndà Yèndè wèwè wàkondopiibwa. Ne itàbùùjà aci ne mwoyi wèbè wònsò, ne Mutàngilè Yèyè.

¹¹⁴ Cintu cìmwèpelè cìdì dipà edi, nkudilekelela ànu cyanàànà kùdìYe. Ncyèna mèmè ngamba cintu nànsha cìmwè to; Yèyè ngudi wakula. Ne piikalàbi ne Cìdì n'Nyumà Wendè wa cipròfetà, mupròfetà ùvwa misangu yònsò ànu ne EMU MMÙDÌ MUKALENGÈ WÀMBA. Cìvwa misangu yònsò ànu cilelèlè. Nènku kwèdikù Dilongesha mpatà to, bwalu nebikengelè bwà kukùmbananganaci ne Bible, piikalàbi ne n'Nzambi. Nzambi

kêna mwà kwamba cintu, kàdi pashiishe kwalukilapù e kucikònyangaja to. Bikèngela ciikalè cintu cimwècimwè aci dîbà dyònsò.

¹¹⁵ Mpindyewu, nwênù bàdi aku abu, itàbùùjaayi. Ne byònsò bìdi munda mwênù, itàbùùjaayi. Mpindyewu kanùtàmbakanyi kàbìdì to. Shààlaayi ànu basòmbe bapùwe mpindyewu, bantu bònsò.

Ànu bitekètèbitekètè ne bitùùlùbitùùlù ne mwênù mwònsò.

Bìdi byènzeka ne, mu dinda emu, muntu wa kumpàla udi mwimàne apa mmuntu mulùme. Mpindyewu netwikalè mwà kwangata Mufùndu ewu nùnkù.

¹¹⁶ Mpindyewu nudi bamòne pândì mwimànyine apu anyi? Mbanganyi bàdiku mwà kuumvwa aci? Bantu balùme ne bantu bakàjì mbòbò aba biimàne apa, bantù kacya nciyikù mwanjì kutwishila mèsù to, kacya bàndela. Kacya kabàtukù nansha banjì kwikala mu disangisha to, kàdi nudi bamòne mwaba wùdìbò biimànyine's. Ki mbamanyè ciikalà mwà kwenzeka to. Mémè ncyèna mumanyè ciikalà mwà kwenzeka to. Kàdi Nzambì ngudi mucilayè. Abraham kàvwa mumanyè cìvwà mwà kwenzeka pààkapàtulàye keelè bwà kushipa Izàkà apu to, kàdi Nzambì ùvwa mumulayè. Aci kukòsaci bwalu's. Ùvwa mumupetè bu umwe wa mufùme ku bafwè, mumanyè ne Yèyè ùvwa ne bukolè bwà kumubiisha ku bafwè. Ncyà bushùwà anyi? Pa nànkù aci's ncikòse bwalu.

¹¹⁷ Mpindyewu, muntu mulùme nyewù mwimàne ku luseke lwànyì, ncitukù mwanjì kumumòna to, ncyèna mumanyè kantu nansha kàmwè pa bìdi bimutàngila to. Tudi beenyi muntu kùdì mukwèndè. Katwèna bamanyàngàne to. Nzambì mmutùmanyè twètù bònsò bàbìdì.

Mpindyewu, ku dipà dyà kùdì Nzambì, bu mémè ànu ku dipà. . . Mpindyewu, mapà awu mmalediibwè munda mwèbè. Nzambì wàkadyànjila kuàlongolola kumpalà kwà difùkà dyà dyulu ne buloba. Mbanganyi bàdi bamanyè nànkù? Pa nànkù kí nciwànyine kwikala cintu cimvwà mémè naaci to, bwà kwangata dipà adi. Nzambì mmusungùle ànu aci cyanààna. Kí mmémè utukù musungùle aci to. Yèyè ngudi musungùle aci. Nwamònu anyi? Mùvwà baprófetà bàà Dipungila Dikùlukulu, ne bantu bashiilèshiiàngàne abu, bàvwa badyànjila kulongolola bwà kucyènza, bwà kwenza cyòci eci.

¹¹⁸ Mpindyewu, muntu ewu yèyè ùsaama, mémè ncyèna mufwànyine kumwondopa to. Muntu ewu yèyè ne lukèngelu, mbifwànyine kulondeshila cìvwà cimukèngela bu mémè mwà kumukwàcisha anyi to. Mbifwànyine kwenzeka ne, bu ne cìvwa ncintu kampànda cikwàbò cyà ne yèyè. . . kaacintu kakesè kàà mémè mufwànyine kumukwàcisha, mòna's, s'mvwa mufwànyine kwikala ne disànkà bwà kukènza. Pàmwàpa ùdì ne ciiji. Pàmwàpa kêna nansha mwena Kilistò to. Pàmwàpa

mmwena Kilistò. Pàmwápa mmushimakajanganyi. Mémè ncyéna mumanyè to. Kàdi bu ne yèyè ùdi ànu mwena mvità wa maalu a mwinshìmwìnshì, mudifindè, ne mulwè apa ne ùdyènza bu udi cintu kampànda? Tàngilàayi nùmonè cìdi cyènzekà, nwamònu's, nùmonè ànu—ànu cìdi cyènzekà aci. Mémè ncyéna mumanyè to.

119 Kàdi, nwamònu's, udi wimana apa, pashìishe udi mwà kwimana ànu bipwàngàne, mumanyè ne Nzambì mmufile mulayi, Nzambì ùtu ùshàala mukwàte ku mulayi Wèndè. Nwamònu anyi? Mpindyewu, Nzambì Yèyè ùshàala mukwàte ku mulayi Wèndè, pankaci apa, apa mene mpindyewu, kùdi bantu aba; mbanganyi kunùdi aku bìikalà mwà kusòmba mwab'awu, ne mwoyi wènu wònsò biikàle mwà kuwìtabuuja? Ne mwoyi wèbè wònsò, wèwè newìtabuuje anyi? Dìbà adi ngiitabùùjaayi ànu cyanààna.

120 Mpindyewu twànjàayi kumòna. Twàngatàayi Mufundu kampànda. Mpindyewu, Simonà Peetèlò wàkalwa kùdi Mukalenge Yesù. Ne ànu ne cifikidi kùdi Mukalenge Yesù, Mukalenge Yesù ùmba ùmwambila ne yèyè ùvwa nganyi, ne—ne kumwambila maalu à mu nsòmbelu wèndè. Èè, Yesù umwèumwè awu's ùdi ne mwoyi leelù ewu. Yèyè . . . Nudi nwìtabuuja ne Yèyè mmubìishìibwe ku bafwè anyi? Nudi nwìtabuuja ne Nyumà wa Maasiyà awu ùdi ne mwoyi mu Èkèleeziyà, leelù ewu mene, ànu mùshindù wùmfwèwùmfwè wùvwàYe misangu yònsò awu anyi? Èyo.

121 Mpindyewu, nwènu bàdi mu batèèleji, bàdi kabàyi ne kartà kàà disambila abu, tàngilà kùneeku wàmbè ne: “Mukalenge!” Mu bushùwà bwà bwalu, kakwèna twartà twà disambila mu batèèleji amu to, ndi mubimànyike bònsò kaaba aka. Nwènu bàdi mu batèèleji abu ambàayi ne: “Mukalenge, Wèwè ndengèku.” Nùjandulàayi cìdi cyènzekà. Nùjandulàayi cìdi cyènzekà . . .? . . .

122 Mpindyewu, mukalenge, bu ne kuvwàkù mùshindù kampànda pa buloba apa bwà kukukwàcisha, mvwà mufwànyine kucyènza. Wamònu's, mémè ndi ànu, tudì ànu beenyi kaaba aka, ki mémè—mémè ewu ntwilangana neebè bwà musangu wànyì wà kumpàla. Kàdi ndi mwambùle bujitu, mémè bu mwambi, bwà kwamba Bulelèlè ne kwikala ntèmù wa Yesù Kilistò. Nènku, mpindyewu, ncyéna muswè bwà wèwè kungambila cintu kampànda nànsha. Ndi muswè ànu bwà wèwè kungandamuna ní mbulelèlè anyi ní kî mbwòbù, nènku Yèyè àcyènzè. Nènku Yèyè mwenzè cintu cimwècimwè aci pa cibumbà cyà ku cyambilu apa, wènzela ku mubidi ewu, cyàkenzelàYe ku mubidi wà Yesù aci!

Awu n'Nzambì, mu Kilistò. Yesù wàkamba ne: “Ncyéna ngenza cintu nànsha cimwè to pàdi Taatù, udi munda Mwànyì awu, kàyi muNdeeje. Yèyè ngudi uNgambila cyà dyenza.” Pa

nànkù kàvwa n'Yesù uvwa wambila mukàjì awu to. Ùvwa n'Taatù, munda Mwèndè, wàkambila mukàjì awu. Kàvwa—kàvwa n'Yesù uvwa mumanyè ne Simonà Peetèlò ùvwa nganyi to, ùvwa n'Taatù uvwa musòmbèlè munda Mwèndè, ùvwa mumanyè ne Simonà Peetèlò ùvwa nganyi. Ki cyòci aci. Wamònu anyi? Ki cyòci aci.

¹²³ Mémè ndi mwà kukwambila, mpindyewu ne, udi mwena Kilistò, èyowà's, mukalenge, bwalu udi ne—ne—ne nyumà wa mwakidilu mwîmpè udi utùtuka ne kapyà kakolè. Nènku, yèyè, mmwena kwitabuuja. Mmwena Kilistò. Nènku udi ùsaama dinyunguluka dyà mutù didi dikupèèsha disaamà dyà cifù. Ncyà bushùwà anyi? [Mwanèètù wa balùme awu ùdi wàmba ne: “Ncyà bushùwà.”—Muf.] Nwamònu anyi? Nwamònu anyi? Mpindyewu, aci ncyà bushùwà. Aci ncyenzèke munyi? Mémè ngààmanyi aci munyi? Nànsha twamba mwinè mmûnyi mùndiku mufwànyine kumanya aci? Kacya katùtukù banjì kumòngana kwònsò eku to. Ncyà bushùwà. Kî mmwòmò anyi? [“Aci ncilelèlà.”] Pàmwápa Yèyè neàkwambilèku cintu cikwàbò kampàndà cidì cikutàngila. Nènkwanbilè. Cintu kampàndà ncyòci eci. Ndi mmòna muntu mukàjì kampàndà ku luseke lwèbè. Ùdi neebè. Mmukàjèebè. Yèyè pèndè, ùdi dijinga ne dikwàcisha kampànda. Èyowà's, mukalenge. Udi witabuuja ne Nzambì ùdi mwà kungambila mwab'ewu cidì citàcishà mukàjèebè anyi? [“Ndi mumanyè ne Yèyè ùdi mwà kukwambila.”] Èyo, mukalenge. Ùdi ne disaamà dyà mwoyi, ntàtù mikòdyàkanàngàne. Ncyà bushùwa. Kî mmwòmò anyi? Ne dibìnduluka, kàbidi. Èyowà's, mukalenge. Mpindyewu, kwèna wa mu cimenga eci to. Udi walukila mu *nùnkù* paùdì walukila kumbèlu apu, uya mutàngile ku Cincinnati. Ncyà bushùwà. Udi wa mu Cincinnati, mu Ohio. Dìna dyèbè n'Milliken. Alùkilaaku, kwèbè kumbèlu, wòndopiwbè. Mukalenge neàkubènèshè ne nenwòndopiwbè, wèwè ne mukàjèebè. Nzambì àkubènèshè.

Lwàku, mukalenge. Udi witabuuja anyi? Mpindyewu ikàlà wèwè ànu ne diitabuuja. Kwèdikù mpatà to.

¹²⁴ Mpindyewu ikàlaayi ne kaneemu kàà menemene. Bantu bònsò mpindyewu ikàlaayi anu mu kaneemu kàà menemene, shààlaayi bapùwe. Nwamònu's, Nyumà Mwîmpè ùtu mwànaadyòngò wa dikèma. Mbanganyi bàdì bamanyè nànkù? Ànu mwànaadyòngò wa dikèma ewu, Nyumà Mwîmpè awu, nwamònu's, ànu dicyàmakana dikesè cyanààna didi diMutàcisha.

¹²⁵ Bilondèshile bangàngàbukà, wèwè udi ne cyà kufwà dyàkàmwè, ne disaamà dyà mwoyi. Ncyà bushùwà. Udi mulwè mùneemu ufùmina ku Chicago, Mukalenge Mosley. Dìna dyèbè dyà kumpàla n'Theodore. Udi witabuuja Nzambì anyi? [Mwanèètù wa balùme awu ùdi wàmba ne: “Èyo.”—Muf.] Nànkù alùkilaaku kwèbè wikalè ne mwoyi, mu Dìna dyà Yesù Kilistò, ne ùsagalè. Nzambì àkubènèshè.

126 Udi witabuuja Nzambì anyi? [Mwanèètù wa bakàji awu ùdi wàmba ne: “Bushùwà’s. Èyowà’s, mukalenge.”—Muf.] Udi ùsaama disaamà didì mu mukòlò wèbè amu. Udi wa pambèlù pàà cimenga eci, wèwè pèèbè. Udi wa mu Owensboro, mu Kentucky. Dìna dyèbè m’Màndàmù Lamb. Alùkilaaku kwèbè kumbèlu ùsangalè.

127 Inábànzà udi musòmbe apu awu, ngwa mu Owensboro pèndè. Udi ne cyùjà pa dibèèlè dyèbè apa. Udi ne cyà kupandiibwa, màalabà. Ndààku, itàbùùjà, ne ikàlà ne mwoyi.

128 Udi witabuuja anyi, mukalenge? [Mwanèètù wa balùme awu ùdi wàmba ne: “Èyo, ndi ngiitabuuja.”—Muf.] Tudi beenyi muntu kùdì mukwèndè. Dìna dyèbè m’Mukalenge Gilmore. Aci ncyà bushùwà. Udi mufùmìne ku Anderson, mu Indiana, mùdì nkwaka munène wa Église de Dieu ùsanganyibwa. Ncyà bushùwà. Udi mwimàne kaaba aka mbwà mwanèèbè wa bakàji udi ne lutàtu ndambù. Mmutekète luseke. Udi witabuuja anyi? Nàнку alùkilaaku kwèbè kumbèlù ùkamusanganè mu mùshindù wùdì mwtàbùùje awu. Èyo. Nzambì àkubènèshè. Ikàlà ne diitabuuja. Itàbùùjà.

129 Udi witabuuja ne mwoyi wèbè wònsò anyi, mukalenge? [Mwanèètù wa balùme awu ùdi wàmba ne: “Èyowà’s, mukalenge.”—Muf.] Wèwè udi wa mu Indianapolis. Wèwè udi mwambi wa Èvànjeeliyò. Awu mmukàjèèbè. Uh-huh. Udi pèndè ùsaama. Ùdi ne disaamà dyà muminu pa muminu apu. Ngàngàbukà. . . Ùdi ne disaamà dyà mwoyi; ùdi ùbìnduluka ndambù. Ndi mmòna ne ùdi mpudimaci mu dicì dyèndè amu. Cidì. . . Lwàku apa.

Wèwè nyumà wa bumpudimaci, mu Dìna dyà Yesù Kilistò, ndi nkutùmina díyì ku Nzambì udi ne mwoyi, pàtukà mu mukàji awu.

Mpindyewu udi mwà kungumvwa bìmpè mpindyewu. Nwènù bònsò bàbìdì nudi mwà kwalukila kwènù kumbèlu ne kuumvwa bìmpè. Alùkilaayi kwènù kumbèlu. Wèwè’s udi ungumvwa, ne udi umvwa bìmpè. Newikalè bìmpè.

130 Udi witabuuja ne mwoyi wèbè wònsò anyi? Ikàlà wèwè ànu ne diitabuuja kùdì Nzambì. Itàbùùjà.

131 Binyòka byà kale abi ne bikwàbò abi’s mbibì be. Udi witabuuja ne Nzambì neàkusàngàje anyi? Nàнку ndà buludì kwàka nàka. Alùkilà kwèbè kumbèlu, wenda utùmbisha Dìna Dyèndè, wamba ne: “Twasàkidila, Mukalenge Yesù munanga.”

Cidì cyenzè ne mbakulè cyôci aci ne lùkàsà lwònsò, mukàji ewu ùvwa ne cintu cimwècimwè aci, binyòka.

Udi witabuuja ne Nzambì neàkusàngàjè anyi? [Mwanèètù wa balùme awu ùdi wàmba ne: “Èyowà.”—Muf.] Èyo, mukalenge. Nàнку endèlaaku ànu buludì ne kwàka, wàmbe ne: “Twasàkidila, Mukalenge Yesù,” kàdi wàlukilè kumbèlu.

¹³² Èyo, mwanèètù wa bakàjì, kùdimukà ànu cyanààná wàlukilè, ne itàbùùjà. Udi ne dyuminyina mu binù, ng'apa nùnkù, ne disaamà dyèbè dyà mwoyi adi, ne bikwàbò. Kùdimukà ànu cyanààná wàlukilè kwèbè kumbèlu, wamba ne: “Twasàkidila, Mukalenge Yesù,” kàdi ùm̀vwè bîmpè. Itàbùùjà ne byònsò bidì munda mwèbè abi.

¹³³ Nudi nwitabuuja anyi? Kàdi bìshi nwènù bàdì aku abu, bàmwè bàà kunùdì, nudi nwitabuuja anyi?

¹³⁴ Inàbànzà mutekète udi musòmbe pààpa wàwa, wa nsukì mifiike, mwikàle ne ciseki, udi witabuuja ne Nzambì neàkusàngàje anyi? Udi ucìitaba anyi? Èyo. Wèwè witaba, Yèye neàcyènzè.

¹³⁵ Ki muiyishi nyèyè ewu musòmbe, musòmbe kaaba aka, ùjinga lwendu lwà sheemàsheemà ne Nzambì. Kí mmwómò anyi, mukalenge? Udi witabuuja ne Nzambì neàkwenzèlèci anyi? Elà cianza muulu wàmbè ne: “Ndi ncìitaba.” Uh-huh.

¹³⁶ Inàbànzà udi musòmbe apa ewu, wàpwèkèshì cianza. Ùdi ne lutàtù lwà mu nyumà lùdiye wèlela meeji. Ncyà bushùwà.

¹³⁷ Inàbànzà mutekète nyèyè ewu mwaba ewu, ùdikonka ní wàpeta mwanèndè wa mu dibòkò. Ncyà bushùwà. Wèwè uvwa mu òmwè dyà ku masangisha àanyi. Mvwa mukulayè, kùdì Nzambì, mwànà wa mu dibòkò. Kí mmwómò anyi? Èyo. Nànkù alùkilaaku kwèbè kumbèlu nènku umupetè. Kutàcishi kabidì meeji bwà bwalu abu to.

¹³⁸ Nudi nwitabuuja ne mwoyi wènù wònsò anyi, nwènù bònsò? Yònsò wa kunùdì ùdi witabuuja anyi? Dimiinù dyà Abraham nedikookeshè ciibi aci, ciibi cyà mwena lukunà aci. Nudi Dimiinù dyà Abraham, ku Yesù Kilistò anyi? Elàayi byanza byènù muulu pìikalàbi nànkù.

Nànkù tentèkèlè mwena mutumba neebè byanza, mwena mutumba neebè, muntu ne mukwèndè. Tentèkèlàngànaayi byanza muntu ne mukwèndè. Kòòkeshà ciibi mpindyewu. Ncyèbè. Ncyèbè wèwè. “Disambila dyà diitabuuja nedisungilè mubèedi. Nzambì neàmujulè panshì.” Èyo, sambilà mu mùshindù wèbè sungasunga. Sambilà mùtù usambila mu èkèleeziyà wenù amu. Sambidilàku bantu bàdì neebè mpindyewu aba. Tentèkèlàngànaayi byanza ne sambilaayi.

¹³⁹ Mukalenge Yesù, tudi tulwa mu Dîna dinène, dyà Bukolè bwònsò dyà Dimiinù dyà Bukalenge adi, Dimiinù dyà Abraham, Divwà dimulaya ku mukùnà kuWàkalongololà mwànà wa mùkòòkò aku adi; ne kutèeka mwànà wa mùkòòkò awu mu cipèèlè, cintu cyà kaciyi cyùm̀vwika to, byà mwomùm̀wè ànu ne mÙvwà mutèeke nshindì ayi, makèlèlè awu amu.

Ndi ndòmba, Èyi Mukalenge Nzambì, bwà Wèwè kutùma bukolè, diitabuuja. Nènku Dimiinù dyònsò... Ndi mumanyè ne nebènzè nànkù, Mukalenge, bwalu Wèwè wàkamba ne:

“Dimiinu dyà Abraham.” Nènku kwòkò kwikàle muntu mwaba ewu ukàadi mudyàmbè mùdiye Dimiinu, kàdi kàyì Dimiinu to, mufwilèku luse bwà meeji awu kaaba aka, anyi dilàkà dyà mukana adi. Ne Nyumà Mwímpè mpindyewu àteemeshèku mu musùukà wèndè kapyà ne diitabuuja didi ne mwoyi. Nyumà Mwímpè àbwelèku ne bukòokeshi munda mwà mwoyi wònsò ne òndopèku bantu bònsò kaaba aka. Nyewù batentèkèlàngàne byanza muntu ne mukwèndè.

Dimiinu dyà Bukalenge ndyambè ne: “Bimanyinu ebi nebifilè bàdi biitabuuja. Bòbò batentèkèle babèèdi byanza, babèèdi nebàsangalè.” Ne Yèyè Wàkenza mulayi awu ùdipù mpindyewu mene, ùleeja Yèyè mwìnè ne Yèyè ùdi kaaba aka. Ki Dimiinu ndyadi ne byanza byàbò bitentekelangana muntu ne mukwèndè. “Bimanyinu ebi nebifile bàdi biitabuuja.” Swàku bwà Nyumà Mwímpè àpaasaleelè mu cyònsò cya ku byanza byàbò amu, àbwelè mu myoyi yà bantu, àbwelè mu mibidi, ne òndopèku muntu yònsò udi mu Bwikadi bwà Nzambi. Enzàku nàнку, Mukalenge.

Ndi ntàndisha dyabùlù. Ndi ntàndisha bupidyà bwònsò. Ndi ntàndisha nyumà yònsò wa bukooyà. Ndi ntàndisha mudicinkidi yònsò. Ndi ntàndisha cyònsò cidi cìbènganganà ne Dìyi dyà Nzambi. Nènku Nyumà Mwímpè àngatèku kaaba Kèndè mu myoyi ya bantu, mpindyewu mene, ku diitabuuja. Swàku bwà bubèèdi bwònsò ne disaamà dyònsò, lutàtù lwònsò byùmukè pa bantu, mu Dìna dyà Yesù Kilistò. Amen.

¹⁴⁰ Mpindyewu, Dimiinu dyà Abraham, nwènù bàà cifuku cyà bukalenge, nwènù bàà mulayi, ku ngàsà ne dikwàcisha dyà Nzambi, mbanganyì bàà kunùdi bàdiku mwà kwela byanza muulu, kwamba ne: “Mémè ngààpecì cìndi mulòmbe”? Twasàkidilaayi. Ki cyòci aci. Ki kabingilà kàà diikalanganakù dyà mulayi nkòkò aku. Ki bwà cinyì mulayi wàkafidiibwa, bwà wèwè wamònakù mwà kwikala mupyànyi wa bintu byònsò, ku Yesù Kilistò Wàkakusùngila awu. Yèyè wàkanùsùngila ku mpèkaatù. Wàkanùsùngila ku mabèèdi. Wàkanùsùngila ku lufù. Wàkanùsùngila ku ifernò. Wàkanùsùngila ku lukitá.


¹⁴¹ Wèwè udi wamba ne: “Mwanèètù Branham, kàdi’s tudi tubwela bònsò mu lukitá.” Kàdi lukitá kalwèna mwà kutùlama to. Yèyè pèndè wàkayakù, kàdi kalùvwà mwà kaMulama to. Cyà bushùwa. Kalùvwà mwà kuMulama to.

¹⁴² “Èè, Mwanèètù Branham, mémè ndi nteeciibwa be.” Nànsha Yèyè pèndè. Kàdi Wàkakusùngila wèwè ku diteeciibwa.

¹⁴³ “Kùtùlombòlùku mu diteeciibwa to, kàdi ùtùsùngilèku ku bubì.” Wamònu’s, Yèyè mmucyènzè. Byònsò mbyèbè. Bintu byònsò mbyèbè wèwè, ku Yesù Kilistò. Yèyè ùdi ukupèèsha byònsò, kùyì ufùta mfrangà to. Kakwèna byà difuta mushinga, anyi kantu nànsha kàmwè to. Bidi ànu byèbè mpindyewu mene.

Kwênàku ne disànkà bwà cyôci aci anyi? Kwênàku ne disànkà Bwèndè Yèyè anyi? Twasàkidila kùdi Nzambi.

¹⁴⁴ Mpindyewu nekwikalè masangisha, edi, dilòòlò edi. Èyowà. Ndilòòlò edi, pa dîbà mwandamuteketè ne citùpà dilòòlò edi. Nènshiilè mpaasàtà bwà kunwambilayè. Lwâku. Lwâku.

Mpindyewu, mu dindà dyà dyàlumingu dilwalwà, bu Mukalenge mwîmpè mwà kwanyisha, nêngààlukilè bwà kusambidila babèèdi, mu tabernacle, anyi ní mpenyi pônso. 

KUKÒOKESHA BIIBI BYÀ MWENA LUKUNÀ LUA59-1108

(Possessing The Enemy's Gates)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dindà, mu matùkù 8 a ngondo wa dikùmi ne umwe, cidimu cyà 1959, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org